

海外紀事

清大汕人翁著

下

進步書局校印

海外紀事卷四

清 嶺南長壽石頭陀大汕尸翁謨

七月初一。海口發舟。是夕也。天色晴霽。四野煙沉。村燈漁火。歷亂繁星。別國離懷。不禁其為黯然者。該伯鳴銅鼓三通。眾船齊棹。船中悉滅燈燭。惟該官持火繩一條。立於船頭。或左或右。或連或疾。皆視一星之火為號令。舵楫應之不爽。出至洋邊。沙磧上泊定。復撤去涼篷。悉一舟露寢其上。夜及二鼓。銅鼓復鳴。百橈撥動。波浪如山。震撼崖谷。眾軍奮及。榜起賊波。盡成碧綫。凝望海中。轟雷掣電。似數十條火龍飛度。岡巒之上。身之彝險。亦不復知矣。假寐片時。東方既白。披衣起視。水色澄滯。不知已入山環抱中。沿海崖石。岷嶠嵯峨。樹上白猿成羣。嘯擲山花野果。紅翠紛披。歧望隔坡。桅如聚矢。詢知則為糧船。候風於會安港矣。八舟俱到。暫停港口。沙平如鏡。一望無際。上有海漂。消螺蜆殼。紅白斑斕可愛。復架涼篷坐卧。因識紅船利涉。為人力強。雖海濤奔湧。而能殺其勢使平。以隨舟也。轉出沙碛。不移時。到糧船泊處。維舟兩岸。人煙輳集。行人負擔。忽忽為起早市矣。一紅船先在鎮土官米見。蓋會安藩鎮云。供早膳頗鮮備。由是始知沿途具供候者。行者皆按日時。時刻不少爽。殆釋然乎。了無

覺具之故而愍軍人用力之齊亦可見王令如山人莫敢易顧語隨杖曰修行薄劣何以當此而不折福乎戒子菴於此者及信向四衆皆持檳榔鮮果茶食禮獻飯訖銅鼓一響軍皆登岸而炊者無問已熟而食或熟而未食或半熟或接浙成奔還解纜柳擊中流時而魚貫時而雁行時列而為一時分而為二時而頹足棹歌莫不秩然中節微風水面湛澹漣漪遠近平坡竹林曲薄既幸舟行之順利復計歸國之有期胸次悠然有未及名言者乘興作秋夜渡海曉抵會安詩三首云

秋生海國憶鄉關良夜歸帆一破顏人語却從天上下詩情多在霧中間疎星入水流千丈遠棹移燈出半山猶問會安何處是不知身到蓼花灣

倒嶽傾湫亂雪堆還移天上走轟雷披衣坐向船頭望大水聲從地下來樹杪鹹波飛電出峰幻落月老龍迴番人送供煙郊外鎮土茆堂隔岸開

老鶯蕭疎逐客程煙波漠漠海中行風寒斷嶺猿聲急浪捲新沙雲影橫落拓人皆疑漫世浮沉吾不尚虛名此時歸去松門下正好看花步月明

既而三台在望矣千峰迤邐皆土獨三台石阜穿田特起兩山臨水一山差小遙視豐茸漸近仰觀大木數圍從石罅生沿山溯洄見石有直矗而起者倒垂而下者穴

竅而深峭壁而峙者。惟不見寺。初謂頑然無甚奇趣耳。去山半里。一僧立而熟望。即返疾走。從山背石隙穿去。山前一墟。墟前登岸。百武為古寺。寺僧鐘鼓具衣迎謁。禮佛坐定。茶新香熱。灑滌整次。竊訝其速。乃知先時望而却走之僧。所為準備也。便欲供齋。余曰。且待登山。後何如。杖策出門。山在寺左肩。環山皆細白沙堆。阜高低。風吹成文。若水波微皺。石壁縫罅。亦如波浪層疊。日射苔衣。丹碧歷陸。四望陡峻。無登陟徑。忽兩壁剝然中開。白石為磴。夾峙懸崖。時有秀木挺出崖表。息蔭其下。如坐函中。涼風達達。往來襲體。令人枕石欲睡。升盡豁然。平澗大樹茂密。倚石為殿。不甚高。堅緻牢實。可以經久。國師化王所建也。出殿右一徑。竟殿復左折。兩崖漸高。雜樹垂藤。多萋葉。洞口暗黑。下階漸光。階盡而曠。日瞳瞳。從天窗曠下。周洞平圓。可容千人。四圍斬削透天。數穴枝葉交影。獼猴攀緣。俯首窺人。叱之不去。住僧曰。人少。彼則羣來狎侮云。一古藤從上石隙垂透地下。粗如盂口。矯矯百尺。直如弩弦。東洋彝曾以千金構求。不許云。生平經遊洞壑頗多。潔淨爽朗。此其最也。惜布置神佛相惡俗。為茲洞之累。茶未終席。為覺寒凜。尋洞口而出。經數巖竇。一一果如登圭峰時人所述者。至山脊。雙石聳峙如門。中門望海。廣漠長風爭門以入。不能正立矣。紆迴右轉。為尼僧

菴曲徑通幽。間寂無鄰。落花片片。山蜂吟掠而已。菴主延坐。一茶即行。殿階之左。一
徑委折下。為汲道。數百步。巨竹為闌。降盡為巖。巖盡雙流。淅淅伏流地下。綆索引汲。
清冽泠泠。稍一盥漱。冰齒寒骨。陟而右折。一洞高爽。旁一石戶。窺之冥冥。有光從者。
曰轉入。則窗牖從懸。巖開闕矣。時方坐磐石。回憶半年。猥處禪林。日與纍纍。墻塚相
對。有此一遊。可謂從前耳目為之一清。惜大好山主人。不加剪刷。令到處荒榛蕪穢。
蟲吟啾啾。倘畧疎剔。點綴則樹石皆生趣。秀發矣。因歎山水之生。有幸有不幸。馬在
中華一丘一壑。亭臺樓館。爭就映帶。文人高士。一經品題。遂成千古名勝。置之荒隅。
窮海。雖奇峰秀石。埋沒蓬蒿。幸而為樵牧之所謳吟。牛羊之所訛寢。一旦不幸為俗
人主意。布置鄙劣。點染惡濁。反令山靈失色。過客低徊者。可勝道耶。則今日之遊。不
可無詩。且為峰洞勒名也。安知千載後。榛莽之墟。不為都邑繁華。啾啾蟲吟。不為觴
咏絃管耶。是則茲山之名。自我而立。詩且為之冠矣。有告以下百丈梯。從山背還寺
者。余曰。且休矣。不妨留連兩日。以窮茲山之勝。何忽忽為還下院齋畢。適國師綱與
從陸始至。訝船到之速。云老和上且遊散兩日。某午餐罷。先行吩咐會安。該伯官整
備停當。駕後日始來可也。方擬題名峰曰海洞。湧曰華巖。作歌。磐石鐫銘。監官聞之。

乃告曰。王令今日送老和上到會安。遂恐某等有違君令之咎。况軍人盈千。此處糧食無所措處。必請還舟。暇日再來。余惜山水勝遊造物亦且忌全耶。隨登舟解纜。行未幾。日已夕。由支河取徑。捷潮涸。為糧船所梗。諸軍下淤泥。推挽不可動。內監怒打軍人。努力扛舟而渡。二鼓抵會泊岸。仍宿舟中。作遊三台山長歌一章。七律二首。

歸帆欲趁西南風。紅船送出祖河中。多情國主重離別。海口復錢登圭峰。道是此峰凌海岸。目送余舟轉粵東。峰頂雲藏永和寺。周迴林木何青葱。繩輿駕出當曉日。刀鎗金蓋排長虹。逶迤導我披林莽。前行沒脛沙蓬鬆。平坡踏盡到山麓。拔地直抵滄溟衝。海氣浮空但煙霧。天風迢遞來疎鐘。斷連仄磴懸樹杪。僕夫喘息穿篠叢。兩步一歇到峰頂。水天冥漠開鴻濛。身危若欲輒傾墜。波濤蕩瀟駭心胸。此時天色漸清朗。煙巒幾點浮虛空。指說征途從此去。三台更是蓬萊宮。我聞發舟不待旦。鹹波棹撥光游龍。蛟鼉潛寐不知醒。達曙忽睹三高崧。嶺岬山根嚙海水。草木石罅偏豐茸。策杖登臨已停午。沙子日炙妨追從。山前寺僧供笋蕨。入座數朵青芙蓉。陰晴石壁異向背。苔蘚翡翠丹砂紅。行近雙崖迎面起。轉側一線天忽通。方圓亂石疊磴道。勾枝仰視時相蒙。如陟太華千尺峽。有玉真可丸泥封。豁然

百丈開平行。應對倔強來。山童告我巖竇一十七。中有一洞誠天工。何須坐此苦
扇。彼中六月長三冬。微茫小徑繞殿後。欹斜石立生榭榭。到頭削壁闢牖戶。皮業
欲度心怦怦。初行窈窕漸黠黠。山鬼暗窺伏人踪。薜荔沿崖牽客袂。躡足葉響迴
秋楓。旁皇注目漏光影。沒階曠日方瞳瞳。地平圓潔若明鏡。舉頭顯敞高穹窿。笑
看環堵坐鶯鶯。通天穴竅垂筠籠。大石如房小如卵。闕湊整截成崆峒。疊文波浪
或冰裂。闕窄起伏紛難窮。古藤直挂三百尺。渾身皺理龍鱗同。幾回摩挲手不釋
坐久便覺寒氣冲。遂尋洞口出周覽。雲巖處處爭玲瓏。登高縱目奔浩瀚。陰泉赴
壑流淙淙。一樹一石一幽趣。惜哉勝槩生不逢。渺無名題稱賞鑑。縱橫怪石埋蒿
蓬。翻遭俗物加點綴。坐使勝蹟虧人功。若然置之通都與大邑。名流觴咏殊舂容。
不見山陰及峴首。羣賢雅集羊公雉。至今傳頌各不朽。空山何致鳴秋蛩。我將華
嚴顏洞峰海湧。長篇短作鐫石精。磨礱山靈人事更否泰。庶與日月齊初終。同遊
居士木灣子。記者別號乃尸翁。

南溟一壑起雲幢。海氣旋空絕壁蒼。忽捲晴天飛霧雨。倒翻大地射台光。巖花曲
引通霄路。澗水分流散谷王。洞口煙霞蘿半掩。山精相逐老蛟藏。

風雷響處湧層巒。隔濶飛猿上翠干。遙望浮天青幾點。平空踏玉白千盤。高穿石竇蒼藤古。細挂雲簾碧乳攢。繞徑蒸沙當日午。偶來息影覺秋寒。

次早登岸住彌陀寺院。宇偏窄。不足以容大眾。分布於觀音堂各處。謂少停幾日。便上洋艦。無事起蓋房屋。以重煩苦軍人為也。該伯內監。終以王令為重。翌日竹木並舉。朝築幕成。寮舍八九間。中為一殿會客。蓋會安各國客貨馬頭。沿河直街長三四里。名大唐街。夾道行肆。比櫛而居。悉閩人。仍先朝服。飭婦人貿易。凡客此者。必娶一婦。以便交易。街之盡為日本橋。為錦廂。對河為茶鏡。洋艦所泊處也。人民稠集。魚蝦蔬果。早晚趕趕絡繹。馬藥物時鮮。順化不可構求者。於此得致矣。大約會安東南西北三面近海。惟西邊一路綿亘連山。接東京而通西粵。故西去數十里外。設鎮土衙門。狀如王府。防鄰警也。客居既繁。因之旋視無歸。而遺骸暴露者。在在都有。余聞之。愀然動念。囑國師語閩客為倡首。募義塚地。收掩孤骨。是為引。

竊惟慶生悼死。乃親友之常情。掩骼埋胔。實仁人之厚德。近見遺骸遍露。多聞旅櫬無貨。背井離鄉。置身何地。不由代白。莫可相成。茲大越國會安府者。百粵千川。舟楫往來之古驛。五湖八閩。貨商絡繹之通衢。間有財並陶朱。豈無義同鮑叔。悲

填溝壑。慘踏牛羊。如其祖居山左。難返太行。設或產自河南。馬回銜嶽。終年浪跡。惟餘兩眼含酸。一旦危亡。頓爾四肢落寞。值眷絕親疎之日。况天遙海闊之方。秋與怨俱深。砧斷杵殘。孤魄淚夢隨家。共遠風吹雨打。濕燐燈骨尚暴於煙郊。信何傳於閭里。利名興盡。歲積體膚勞。腐朽誰理。路窮僮僕散。孰料半途捐館。堪憐絕域棲魂。雁斷長空。那得尋聲。遙赴閨中有待。還思滿載歸來。憶昔歡歌慷慨之音。竟同流水。只今俠氣周全之誼。須藉路人。顧范希文。麥舟之助。古道猶存。想徐孺子束芻之儀。遺風可續。即一粒一錢之樂贈。亦再生再世之弘慈。得葬高原。招回故國之魂。當圖結草。但求坏土。縱作他鄉之鬼。亦賴脫驂。非徒惠於無名。勝矣素車白馬。若施恩而不報。悲哉芳草王孫。欲舉義墳。必需善士。緣應首倡。愧糠粃在前。事必合天。頌功德無量。謾比鶴歸華表。相將牛卧介山。挂劍延陵。埋琴子敬。勿辭協办布告同心。

是引即書付緣首國師。讀畢頂禮云。今彌陀寺當此衝要。為往來雲水止息之處。歷年久遠。風雨傾頽。某欲重建。乞垂一言為引。進知老人以筆墨作佛事。現毫端之寶刹。微情仰白。必叨慈允也。因作募修彌陀寺疏。

唯心淨土。雖云處處現成。自性彌陀。設說般般。具足無為。必藉有為。而顯真諦。須憑世諦。而周煉石補虛空。終美媯皇之手眼。布金隆法會。選推長者之神通。奇功全賴人興。勝事豈堪坐視。惟茲梵刹。創自唐朝。寺在會安。乃八郡三州之要道。僧投大越。實雲來水往之衝途。頓開接引門。便是安禪地。十洲東望。霞明連滄海。蜃樓十里南馳。花發映占城春色。對艾山而煮茗。儘容高士行吟。濬沙沼以栽蓮。足可招賢集社。滙洋常住。凡聖同居。道場既啓。啓於當年。因果不泯。於此日。雖靈臺無變壞。奈歲月有遷移。昔者廢。今者興。佛面猶存人面。改三日風。五日雨。戒堂零落。食堂頽圮。擎拳韋護。攔不住泥塑金剛。吐舌哼哈。喝不定木雕彌勒。香殘燭燼。誰知苔蘚到厨生。寒蠹暑侵。至使法身露地。立耳聞尚然。動念目覩。馬不關情。爰有果國師。慨思重建。願與執腸漢。協力同行。若言西方十萬程。當面錯過。直饒苦海無邊岸。回頭便登。是官是民。起早上慈航。普渡善男善女。何必待沒路。思歸信意。揮來總是箇中極樂。乘時拈出。並非分外機緣。山門大殿。須教指日告成。雲室廊房。都要斬新輪奐。華屋頽起。獨木難支。順風而呼。知音必應。賣簞客幾多金。自湘水傾流。能事備矣。棄家兄無數物。從風雷運至。厥功偉哉。莊嚴諒已熟聞。福德無煩。

再述

到不幾日。尚有衲子未及在順化登壇受戒者。朝夕禮求。洋船尚以客賬未起。無能放關出港。特代啓王批。凡官軍所欠客賬。限日完結。始訂初十出尖碧蘿。備薪水。老和上十五六上船。候風即開也。僧俗懇戒者不已。因念未即開船。有十日之暇。彼輩拜請篤切。何惜三日之勞。曲為成就乎。遂許初七日傳戒。報聞遠近。至期四眾戒子三百餘人。悉為成就。命國師及後堂給牒。仍走札與王用印。天氣經秋。尤然酷暑。隨杖相踵。傷暑發火癩。醫莫能治。惟食西瓜冷水。獲愈矣。寺之右有關夫子廟。嵩祀最盛。閩會館也。主會預乞祝文。漫為走筆。

迺聖迺神。允文允武。讀書明大義。具法眼於一部麟經。報國盡孤忠。抱遺恨於三分鼎足。但知有漢。豈肯受孟德壽亭之封。業已無吳。不妨爽子敬荊州之約。秉燭達旦。挂印辭金。一生謹守臣心。百代崇加天爵。自古英雄稱帝。稱王未有稱夫子。倚殿超哉。從來豪傑。即正即直。如斯即聖賢。蔑以加矣。高人烈士。動輒長揖傲王侯。若美髯公之遺像在茲。自然稽首。孝子義夫。無過一方隆俎豆。乃普天下之昭承。由是莫不感通。處處山呼。年年嵩祝。某等躬逢上壽。叩拜下風。同志二百六十

餘人獻爵五月十三吉日聖其降耳凜凜猶生神則饗之洋洋如在伏願河清海晏長浮蘋藻之香世足家豐共沐歲時之慶微情敢告

七月十三日洋船移棹先將粗重器物付載船上然須十五始到尖碧蘿約二十日登舟候風王差番官通吏道及僧鐵帆送余歸國十九侵晨監官備田姑船四十隻坐余紅船中午後解纜時余雖喜指日還鄉然謂風信水勢過期行未必果但不欲明言恐為兆耳至港口夜泊候潮三鼓齊發平明抵碧蘿上洋船定十二馬籬為偏窄以歸故可相忘矣王差人候問所需計無有缺轉恐風信延遲不妨多貯水米以備不時因書付差還報越兩日赤白米共四十擔運至訝其何速知者曰此間有象路為王急使之徑一旦可達順化令到即港中糧船支發故快耳內監該伯告回船亦整頓貯水專候舉帆隨杖在彌陀寺中無一不發熱出癩者獨余最後將謂可免不意上船三日而寒熱起矣連日皆東北風雨色微濛山不見頂客老此皆曰此作春也大越氣候歲以秋冬為春夏秋冬時每陰雨連綿雲霧四塞諸溪水漲路斷行人百物騰貴束薪十錢不熟一炊居人預為之備謂之做春斯時則羣山無影茫茫海中莫辨所向船不敢出口矣以故風雨因病轉添病因風雨增劇奄奄一氣喘息

船中差僧鐵帆棹還會安延醫兼報王風信不使狀至廿七過午漸晴徹夜星光明
日白露次早即速開船船主終以風信不使為辭且謂差僧未還病無醫藥歸心如
焚遂乃明燭燒香望西南起拜持咒禱風薄暮西南風起差僧亦至矣於三十日鳴
鑼起棹數十田姑艇纜帶出口風正滿帆渴望得歸此樂何似是夕也木灣夢一人
裘帶都雅夢中驚異何從得是人流寓此間者耶既而謂木灣曰汝曾讀愛誠子書
當知在老和上不難相助然有說焉手出革絳與之且曰為我寄和上將來因緣在
此也夢醒歷歷乃述與余不知何意是時船正疾行皆不理論而南吹漸微舟所進
幾與所退相敵頃刻大雨北風猛作勢不可支舉船盡以長沙為憂余披衣持咒久
之東南一陣颶風陡起黑夜雲霾手不見掌各倉惶聽命總管見龍行隱飛舞於船
左右約一更龍去從前北風所飄流之路須臾盡復風雨後海光天色照灼遠近至
是而歸心始灰矣平明霽色見山痕澹澹不數十里外仍是尖碧蘿也隨風竟返至
山港舟人擊鼓審神各加額曰餘生再造也連日風浪滔滔海邊小船盡推沙坂之上
余時寒熱腹患漸止飲食不進况船上擷撲多日肌澤無存朽骨數莖而已木灣語
亦爾侍者云今天氣風色如此勢不能開船歸國聞此山上有觀音堂何不且請老

人上去一沾土氣。運行血脈。或可加餐乎。適又聞述初六有大風。邊海人風色素。謂不可不信。何苦令老人病軀復受顛撲也。亦爾不向余明言。但一上岸踏看。即駕兩小船來促登岸。此特風浪漸緊矣。觀音堂離數里不能往。僦居草屋。門檐低壓。磬折以入。行人數至摩頂。蓋近海避風制唯爾也。坐定風濤轉急。入夜颶風怒號。摧山隕石。茆屋盡倒。潮撼羣山。聲勢凌厲。碎人心膽。余幸得片地棲身。念船中諸子遭此危險。生死間止。容髮慄慄之狀。不知何似。然黑夜風濤將奈之何。竟夕為之不寐。乍曉船上者奔至。皆曰重生。昨宵情狀。可不言矣。過日晴霽。強起扶筇訪之。方人乃知即岫嶼山。葛洪因是而請為令者。然丹砂無復氣矣。形勝殊佳。地脈疑有靈焉。洲島數峰環抱如几。海中平橫一案東缺。復兩山對峙為塞。中則洋船出入門戶也。直接主峰之下。有本頭公廟。廟左百步有石泉清甘。村人所汲。男女浴者無虛候。俗記好浴果不誣也。山足平沙如半月。落落茆屋不滿百間。除老弱幼稚藉於官者。猶三百壯丁生事漁樵二者而已。醴腊具腥。比戶然也。山皆石樹木蒼蔚。遍山花果。牧豎鼠雀之餘矣。廟頗私敬神甚靈。洋船往來必虔禱祀也。命該社開局鑄侍者。上香一瞻神像。請封銜。知即漢伏波將軍本頭公。國人所崇。該號云。塞帷瞻像。儒雅風流。木灣恍然。

曰疇前之夜見夢者儼若人也始憶誠子書伏波所作革繒其佩韋義乎因緣宜緩
老和上今歲殆不能還神人明相告也壁間粉板有徐孚遠七律一首字為塵埃封
掩拂拭讀之甚佳是以效顰作詩書壁

濤聲滾滾石巉巖漢將神祠祀碧崑自昔節分東下水至今人渡北來帆夢傳佩
韋言三復預報遲歸書一函千古威靈遺像在秋風落日照安南

先余數日放洋一船名馬艦亦是日還茲舟海上有名便利人力精銳至是三出皆
返遂羣決壓冬之志壓冬者洋船他國度歲之名也歸興冰釋鐵帆馳報王未返倘
徉於濃陰鬱之上作岫嶼阻風詩十首

已去復還住秋高故國心念將身命重緣與島嶼深孤嶼無猿果鳴皋有鶴音朔
風連日起花雨散前林

歲序秋將半安南始作春波濤聲徹夜雷雨勢經旬山色今朝綠泉派昨雨新與
圖記風俗好浴果然真

田姑名船送出淺貫索帶勝艫鉦鼓喧晴日西南正好風寧遠岫嶼港復問本頭公
欲假明神力揚帆指粵東

留戀舟師意蹉跎。白露時人情看既。爾節候况如斯。微吹輕難進。回波急莫支。故山頻悵望。不獨我歸遲。

開疆原漢代。請令葛洪過。服食無仙吏。靈祠有伏波。丹砂空髣髴。風雨在巖阿。惟見漁樵徑。煙寒月下蓑。

病軀苦危浪。磬折入柴扉。海颶秋方盛。銜茆夜盡飛。村燈微欲曙。林鳥濕難歸。不寐愁諸子。中流何處依。

強起看秋色。扶筇傍澗隈。沙明前渚月。潮響夜山雷。野果留官禁。飢猿向客哀。片帆歸日暮。妻子喜魚回。

遠近皆漁舍。中厨水族多。居然充甌粟。竟可委田禾。腥氣透微入。秋聲卷樹過。渺余滯南國。長日盼滄波。

缺月漏茆屋。危風振海颶。水雲迷舊國。風雨正生潮。野鼠依山嘯。寒龜駕浪驕。病中眠數起。竹影對蕭蕭。

道人遺菜把。相逐笑顏開。邊海那能得。空山何意來。洋船留不返。番使去忘回。上下無交日。鄉心夢裏催。

是日鐵帆迎船至矣。午後返會安。王差內監齋書。紅船亦接到。便欲迎還。順化供養。奈病體羸弱。不任舟車。復於彌陀寺結茆葺宇。安住大眾。庶就參考藥餌。調息精神。怡情翰墨。消此客中歲月。間止順化見王而已。不謂王聞不果歸粵。先自慶慰。語人曰。吾苦留老和上不可得。今風信為我稽行。豈非龍天挽留老和上於我國宿世緣深耶。亟促國師來。久雨潦溢泥塗。未即行。王遽命撤禪林方丈。另蓋於天姥寺。差人候請。既而兩番俱報余病未堪勞役。乃續遣奉書。并人參。至感此眷眷之情。往答未能。暫裁書着侍報謝。

前者老僧萬不得已。必欲還山。悉在王之洞鑿中也。時王苦留不住三年。亦須一載稍盡供養。自顧薄福。抱慙忍別。勞駕統領闔國文武貴官。相送海口。挽登圭峰。設餞而後送過會安。到尖碧蘿山前。及上洋艚。秋經白露。船主夥長皆言北風甚急。帆不能放。老僧持咒祈請南風。次日西南風起。擊鼓鳴鑼。揚帆出海。經兩晝夜。北風漸作。行莫能前。於是再祈。午後南吹滿蓬。正發巾頂疾行時。忽然北風飛浪。大雨傾盆。龍騰蛟起。地覆天翻。幾乎有萬里長沙魚腹之患矣。余惟默坐持咒。正在慌忙無措處。陡作一陣東風。將船送回碧蘿山下。諦想龍天。亦有欺貧重富心。

不然何偏吹些不順風使老僧去不得以滿國王一年供養之願竟不管我常住
大眾廚庫絕糧王聞老僧不及歸乃歡喜曰天隨我願也即令內官發紅船接到
會安亟欲來朝奈飛濤疊浪中拋擲二十餘日腹瀉頭疼寒熱交加隨杖僧眾皆
然正在病中未得遣候為悵不出半月疊來手札每送人參老僧抱疴正用得着
在玉殷殷之意極盡師生之情然事事累及使余中心覺難為詞耳惟指海月天
雲與吾天縱道人共相照耀也良晤非遠餘當面罄風雨深秋縷縷不宣

連時陰雨河水泛漲寺門板闌維舟氣候漸涼侍者從順化回言王見時親熱喜悅
之狀細詢老和上飲食起居始知果病因道似此則隨老和上方便暫時將息俟稍
平復訂來日期即撥夫馬應接幸毋留戀會安我之望老和上如望歲也况相隔涉
一切供養難以周到於心惘然無容自安耶花郎布一疋副以綾緞為老和上添冬
衣其餘洋布絹素為大眾各製一襲仍差內監同心祇候榜眼文職世男及王兄醴
泉侯韶陽侯三君聞余復還相慶忭俱差人持札候請各付書回報與文職世男曰
老僧本是箇擺脫決烈漢到者裏却弄得去來不由也舊秋蒙王惇惇遠召自謂
脚下紅線已斷繫絆不住跳出山來上了洋船竟到貴國深叨王臣皈依正好與

吾公朝夕盤桓。不奈故山有箇大眾鉤子。鉤在心上。不得不回。國王挽留。縱以鍊子亦鍊不住。定要還山。誰知海外龍天。要合玉意。竟不用鉤鍊。只用幾陣北風吹了轉來。去又去不得。住又住不安。一往還見道路開闢。近日被波濤擲撲了一番。止息於會安養病。大似老鼠入牛角。要不得箇轉身處。伸脚縮脚。不是故山鉤子牽。便是本國鍊子拉。日來又被土人挨挨擠擠。兼之內外魔鬼。夾夾雜雜。又要我費許多周折提防。一時那得箇救脫菩薩。直饒藥師佛來。亦不能療我之病。適有唐人送東洋小菜。吃了兩碗薄粥。放開懷抱。想做幾首詩。聊為消遣。左思右想。總尋不出一句。偶欲登廁。在圓板上蹲了半日。作了一首。回到房裏。睡在被窩中。枕頭上。摸摸索索。又得一首。意思再作幾首。一并錄呈台覽。同太翁家宴時。作一撫掌笑具耳。茲者手教先頒。不待詩完。急念修候。近履雖聚散常事。不足為念。獨念別後。不知吾公定省下。可能謝絕外務。靜坐讀書否。年少光陰。寸寸皆金。非可容易。多有人處。此時看得金如糞土。浪費去了。深為可惜。如老朽自幼亦耽讀書名。尚不知味。方要學書學劍。又因多病。二皆無成。遂從黃面老子學不立文字之道。三四十。年。強稱知識。主席開堂。常有數百眾羅列座前。到底自覺孤陋寡聞。

終以不曾讀書為愧。每想此時得如二十一二歲血氣精壯。從新十年勤攻苦學。到三十一二歲上出世行佛祖道。不亦更有一番光彩乎。天地間未有年老復少之人。徒作此妄想。時事已去。七八追悔不及矣。今喜吾公生長在禮義大家。上有太翁為朝中大臣。左右有賢師友。造就不消十年磨劍。必期出海屠龍。何慶快如之。惟恐好光陰錯過。因以老朽自悔之言。聊為追風天馬。旁加鞭影也。愛公心切。信筆直陳。冒昧之罪。知能見原。

復王二兄醴泉侯書

急急欲歸。忽忽作別。大都事在忙迫中。偏有礙脚絆手。時承賢王昆玉遠送。及到尖碧蘿上。得海船已經白露。行了幾日。南風不便。去而復返也。又蒙差員遠惠手札。始知八月間加官陞祿。不勝雀躍。最感者。廊廟功勳。不棄方外老朽。非吾公出人頭地乎。遐想中秋佳節。進爵時應唱一曲。受榮華富貴長春矣。老僧當攜拄杖跨過山來。與公說些在家有意思之學。道人不被功名富貴埋沒。就在富貴裏做工夫。終不打成兩段。始見處處綠楊。看擊馬家家有路。到長安的落處。將這些古今會討便宜。開心快活話。暢談十日。一為慶賀。一為叙懷。一為學道樣子。一舉三

美何樂如之。今尚淹滯在彌陀寺者。總因洋船上風浪擲撲許久。一吐一瀉。弄得筋疲力盡。止剩得幾根硬骨頭。不曾折斷。日與病魔支撐。滿擬以病了事矣。誰知病又不成。病事又不成。事如此。半三不四。自覺可笑。極承寵問。稍容幾日。病去就來。目下有無數欲言。筆不隨口。未能多及。留與面賦。

復王三兄韶陽侯書

大士道體遠和。老僧亦在病途。無能奮飛左右。一候起居。歎仄之懷。未易名狀也。日來風雨蕭蕭。眠食俱廢。方外人別無繫戀。惟天涯知己。道誼相投。未得問訊。榻前不知尊候若何。不由不悵悵耳。適接來札。喜慰之至。承教云。世情冷暖。變態非常。誠古今同歎。豈知盡世界。只有一箇冷字。暖字焉可得哉。此必早在洞鑒中。可發一大笑也。嶽誕之辰。老朽惜懂。竟失嵩祝。近日客窗病起。澄墨作得一幅蒼松疊嶂圖。跋一篇。只在此山中。雲深不知處。的說話。藉手獻之堂中。聊為吾公形容古道。縱未能寫高懷。亦盡老僧本色。未審與美德真風。有當乎。草塞奉復。不一不

一。

一日病起。卯堂。客有過而問者。謂春生夏長。秋收冬藏。此四時氣候之正。惟大越國

中反向秋冬風雨百物凋榮至春夏焦枯其故何也余曰天地至大難以名言然約畧亦一氣運行不息而已無春夏秋冬之殊無氣候正與春正之異皆自人習於其地而強立之名耳由一氣分而為陰陽方與定位東南為陽西北為陰西北山東南海山屬陽而生陰方水屬陰而生陽位是方輿之陰陽互為體用也正見得奇為偶之所本偶為奇之所生獨陽不生孤陰不長東南陽位多水為陽質而陰用也由是分之所以水亦陰用而陽質鹹波夜濺盡成火光則其驗矣此邦極南環海純陰為用而含陽質當秋冬窮陰之候土薄水盛陽質動蕩不能固藏而發洩蒸於上陰降為雨澤滋榮百物陽方土暖便爾發生至如西北土厚秋冬之時陽氣伏藏陰凝於上陽不交通下為霜雪百物凋謝此乃易知而可言者若夫造物無朕之初冥然漠然莫究於終始有神可得而會口不可得而喻者則非居士所得而知也已客唯而退因斯氣候不同北人稟質到此輒會生病加以不諳調攝竟成不起先數日古崖侍者江北人報寂於順化今恬波堂主山左人相繼圓寂於會安雖生死天命而轉展之權又在乎人然未始不為南北水土不習所由來也茶毘之日藩鎮撥數百軍人服役刀鎗幡幢排列前道會安傾眾執纜余為舉火封龕法語別錄恬波本宗顯

聖下兒孫。囑累有年矣。大凡禪者。八識未明。六識觸境。當卧病時。不免痛苦呻吟。殊不自勝之態。余願慰其疾。書以示之。

謾云世上萬事俱假。不知連此身心。亦從假合而生也。夫有生則有老。况經風雨晦明。寒暑代謝。喜怒無常。飲食失度。諸念雜沓。四大難調。稍一觸發。百病頓作。隨後就有一箇死字來。未免手忙脚亂矣。老聃云。吾有大患。為吾有身。古聖先賢。視身為大患者。深知五欲牽纏。七情催逼。一墮苦海。千生萬劫。無由出離。所謂一失足為千古恨。轉頭便是異途人。話到這裏。寧不悲痛乎。惟有明道一路。可求解脫。孔子謂朝聞道。夕死可矣。豈徒然哉。若非明道。縱置身化樂天宮。終為衆苦煎熬。所以金輪王之極樂極富貴。大覺老子不屑為。而子夜越城。雪山學道。今即將大覺老子之果位。與我再來出世度生。受人天四衆供養。稱為三界福田。以我觀之。猶見廁穢掩鼻。閉目趨避之不服。曷肯廁身其間。蓋有身是苦。只這一箇身。尚苦不了。豈當再作一箇苦。不但老來龍鍾之苦。少年無知。便是苦。不但病來磨折之苦。無病多欲。便是苦。不但死來離別痛楚之苦。未死顛倒錯亂。便是苦。不但貧賤瑣尾求人不得之苦。富貴驕傲輕薄縱情。至放肆取樂。總是苦。嗚呼。人世痴迷焉。

知樂是苦。因知此是極苦之境界。始能發心求道。尋向這條路上來。其不思解脫。甘心苦趣者。猶蜣螂抱糞。以為一生受用不了。樂在其中。任人旁敲正打。只是不捨業識貪戀無救無歸。此類竟可不必與之言矣。在吾輩割愛辭親。出塵離欲。自必學道求了生死大事為急務。不然披緇受具。何為耶。則又不得不與言也。或曰。行脚參師。專求明道。奈愈求愈遠。而難明。年復年來。看看老來病來。眾苦齊來。以至日暮途窮。進退無地。未識為人導師者。當何指示乎。悲夫。道不遠。人人自遠之。殊不知爾我朝同佛起。夜抱佛眠。飽暖飢寒。何曾離却半步。喜怒哀樂。去來動靜。經行及坐卧。常在於其中。只為太近。將謂別有。未免對面千里。何異世間常人。日逐妄想。孳孳名利。背覺合塵。全無一念回光。直至老病到來。始見般般非樂。頭頭是苦。及求解脫。手足無措矣。苟真學道者。必不以樂為樂。而苦為苦。老之一字。正是我人之引進大師。病是良藥。死是醍醐。若非老誰肯息念。非病誰肯退思。非死誰肯修行。如老僧年來抱腹疾。無日不與老病相對。既不能免。何妨就在老病中消磨歲月。安心待死。今雖未死。而天下無有不死之人。縱有不死者。亦無非遠觀山有色。近聽水無聲而已。目下况在海洋船上。風濤顛撲。發寒發熱。又吐又瀉。正

病在沒奈何。我却開一隻冷眼。反看三十年前光景。從頭檢點。將來要一些活氣。全無。却是箇死和尚。原來死了的最難得活。以後十年。畧有些活意。就作了箇活和尚。可奈活了。又難得死。近十年來。覺有點子動蕩氣息。反弄成一箇不死不活的和尚。拖這皮袋。東來西去。不管天坍地塌。有一日過一日。遇一事行一事。聽憑今日要死就死。不死又到明日。倘若今年不死。還到明年。或明年又不死。年年日日。且如此過去。雖然不見死來。却見老年作伴侶。病來送藥石。就此得些逍遙自在。又未免泰極否生。便有一等無知作祟。吹毛求疵。搬些是是非非。來是非又不明。來多在背地裏。鼓弄起不風之波。以莫須有。夾雜嫉妬。萋菲橫加。歪派將來。總要使人過不得。以快其心。誰知我却與箇不驚不怖。一槩消歸於無影山下。大水灘頭。付之東流去了。幸藉此淘汰得志。慮益精。行願益堅。不亦愈磨而愈不磷。愈涅而愈不緇。是知此輩逆行菩薩。不是嫉妬萋菲。實係為煅鍊我之嚴師辣友也。每待死來。死又不來。起此身未死。且教此心先死。先令不死而死。自知死而不死也。恬波堂主。不謬吾言。即當以吾自受用三昧。剔起眉毛。仔細體貼。一上。若在堂中作得主。何處不可作主。莫說老病來。連死直闖到面前來。一齊放下。掀翻窠臼。

正德麼時將甚麼喚作生老病死苦集滅道無非是成就我之大解脫場噫看到這裏滿目逍遙通身慶快不獨無苦且有真樂焉恬波於此豈不發一大笑也哉越數日掌清左樞密訃至掌清為大越棟梁職典樞要累四朝矣老成練達長沉厚毅勇畧過人當占城構禍時王命秉鉞南征連戰克捷斬將擒王拓地數千里黑蠻蛇鬼聞之破膽所至秋毫無犯大得人心奏凱還朝彼方至今懷德有五子皆官於朝王方待用為鎮土大將軍以彈壓邊境年六十三一夕無病而卒王為輟膳流涕遠近聞之無不痛悼自余初到即來往依依竟受為菩薩戒弟子計至亦不免為王惋惜也遣副寺備賻儀往奠為序詩輓之并書慰其五位公子序曰

竊惟丈夫七尺軀立功名於大越雖素悅竊靈而生氣如在海洋百戰處為保障之長城至加封贈諡而公論彌昭拜命生前聲聞赫濯圖形身後俎豆蒸嘗拂衣之願未酬蓋棺之事未定誠可歌可詠之巨業實兼文兼武之能人茲大將軍掌清阮公者一代元勳四朝尊宿降神在分茆岫嶼之地鼓餘勇於伏波勵志即投筆授書之時騁高宗於定遠眼底無八千子弟胸中有百萬甲兵閉日着鞭不待聞雞而起舞臨風踏坐還思捫虱以雄談抱一腔報國之心值四郊多事之際建

牙開存秉鉞。登壇擒王於占城。爪暹之間。烏蠻不敢復反。斬將於真臘。淳蘇之界。南顧從此無憂。三箭定山。渾身是膽。涉閩關而長勞。汗血。歷行陣亦每具風流。洗甲灘頭。共喜投醪。惠效運籌。關外爭看露布書。還入座賢豪。揮麈彈棋。將軍原有揖客。洄瀾砥柱。出弼入輔。德主豈無忠良。正期訪赤松以遨遊。何須屏大樹而晦蹟。島裏之神仙方集。人間之至樂未央。豈意將星忽墜於西乾。遂令鶴影空歸於華表。艾山淚碑猶在。誰繼輕裘緩帶之風。草堂繪像維新。虛懸羽扇綸中之度。縱不傳人而傳事。亦且多藝而多才。幸世祿垂之後。昆雲臺接踵。况表章出之黃誥。泉室增輝。老僧一介水雲。好讀烈士暮年之詩。而壯心不已。未臨疆域。早聞蛇鬼破膽之日。而豪興欲飛。國乘曾未請觀。梗槩幸先祖識。竟為裁詞。巴里畧布私衷。續成載道。凱歌宣揚。麾下莫笑毛錐鈍。置仍從犀甲分光。一家言未盡平生。百將傳須添幾段。鄙題鄙句。不成美玉精金。愈出愈奇。自有雕龍繡虎。鼓吹氣節。摹擬雄圖。分壘文壇。孰許稱為勁敵。歸功鈴閣。吾當隨次安營。勿嫌紙上談兵。聊寫江邊橫槊云爾。

伊維景會。賢哲篤生。嵩神申甫。傳說星精。光流日月。重輪東升。倬矣海邦。君德休明。莫用匪良。濟濟羣英。穆穆公孤。桓桓干城。樹人燕翼。績緒不更。世臣故國。喬木同榮。四朝碩德。實維掌清。維彼掌清。華浪奔鯨。折衝樽俎。補闕調羹。吳牛不喘。瑞麥雙莖。三登比歲。夜麗不驚。踞洋立國。一柱天擎。興於文治。豈樂佳兵。蠢爾烏蠻。敢犯邊盟。赫斯震怒。整旅徂征。禡纛臨河。蕭蕭馬鳴。好謀勝算。奪魄先聲。向無堅壘。突陣縱橫。義旗攸指。漿食郊迎。依然歸市。不變春耕。孰止一人。弔及蒼生。獻俘宗廟。飲至于京。王嘉乃績。酬彼兕觥。荀氏五龍。曰蔭銀璜。世其模楷。欽哉老成。何天不愁。棟折梁傾。王聞輟膳。涕泗填膺。同僚後進。歎失芳型。庶民巷哭。軍旅哀營。碑鐫舊業。路誦銘旌。勳澤在人。感傷中情。詎識君侯。含笑泉塋。子房辟穀。李泌還衡。終防輔國。預鑑韓彭。公胡如爾。在道簪纓。東方大隱。老子周卿。奄然報謝。委脫蟬輕。于今于古。載起載行。去從來所。不虧不盈。靈光一點。噉噉長庚。歌之詠之神。聽和平。

慰樞密掌清公子書

向嶮阻風。不得還山。止卧病於彌陀寺中。忽報掌清樞密公死矣。乃皈依老僧之最。

莫逆弟子聞之合掌念佛無一毫惋惜悲悼也。何故。大越國中軍民男婦誰不知掌清太翁方正立身。忠孝輔國。拯溺扶危。好善樂道。今當蓮花化身上品上生。吾甚為之法喜。何悲悼之有哉。然一旦拋妻棄子。賢公五位。及闔府眷屬。有不烏號痛切。望空追影。想念無由。未免歸怨天道無知。報應舛錯。或以佛聖言教皆不足信。嘗聞佛言善惡之報如影隨形。聖言為善獲福。為惡受殃。理固如是。事又不然。莫能解矣。還可信理而行。使人不改其初乎。蓋不知劫火洞然大千俱壞。而佛祖聖賢靈光尚在。至今照耀迷津。如太翁為國家梁棟。梵苑干城。建功立德。繼往開來。其靈光常存而不昧也。且人生七十古來稀。太翁六十有三。時至西歸。功業在天下。道德在天下。樂善名聞在天下。將來賢公輩。龍驤豹變。聲名赫濯。一一在天下。誰不稱之。頌之。感之。念之。則太翁死而不死。此即天道分明。而報施善人不爽也。何佛聖言教之不足信哉。是以老僧喜之不暇。而不復為悲悼也。大凡悲悼者。為人世自己。有不足處。可悲可悼耳。願賢公輩。以父之道。沒世不忘。非獨章大孝。並行大善於天下。代代如此。皆成不死之人矣。話到這裏。老僧病亦霍然。還羨太翁生中得死。老僧又在死中得生。於此具隻眼。縱去太翁十萬八千里。無一絲毫。

間隔也。且道。即今面目在何處。聊為下箇註云。若非羣玉峰頭見。會向瑤臺月下逢。特遣副寺僧持辦香勺水。畧叙輓歌申奠於太翁之靈。并惟賢公節哀自慰。餘懷縷縷。未盡筆舌。

海外紀略卷四終

清 嶺南長壽石頭陀大汕尸翁譔

閩客饋片月糖一器。稱花乳糖。潔白瑩徹。入口清甜。比蔗糖差實。因叩之言。占城東
庸寨及東洋一帶。有樹名丹梛。本在草木之間。微有疎節。身似檳榔。葉似蒲葵。較大
可為蓆。三四月白花從葉根生。一莖數十朵。如木槌。與檳榔垂實無別。從莖上扭爛
白乳流出。繫竹筒於破處。經宿即滿。熬而成糖。花時始有。否則乾猶婦人育而始乳
云。彼中漫山遍野。竟不由栽種者。可見天地間耳目未經。何所不有。如天地八陽經
載。雀壓油樹生酒。但平常事耳。土人既視為常。過客又無心於探奇紀異。故物湮沒
而不傳。王又曾言高棉國山中。有人尾長三四尺。聲音笑貌。並與人同。一觸其怒。即
噬人啖食。人莫敢近。亦惡物也。病軀弗藥。涼夜初長。風雨連旬。孤踪海外。念生平白
社。散處天涯。唱酬無侶。率成書懷詩六首。以貽知交。

病起虛堂聽海鳴。入秋滿地水雷生。誰來白社尋支遁。遙望青雲憶子荆。踪跡杳
無鄉客識。鬚眉歸使故人驚。多年不作雞窗夢。此夕偏深風雨情。

久客思歸懷古樓。夢回猶道越王州。竹聲晴作空林雨。山色陰含老樹秋。人愛孤

吟來小院我攜明月上扁舟芙蓉花放沉香浦惆悵年年結伴遊

良夜空階偶影孤隔洋好友夢來無讀書終想林高士作賦空懷楚大夫
管井秋生鳴蟋蟀洞簫風急起眠烏美人南國多離別誰復攜琴泛五湖

記得春來又復秋西風吹動海潮愁青山欲斷雲無斷碧水常流沙不流
病客何堪花照眼懷人况復月當頭紛紛露下砧聲起遠樹連天獨鳥投

海外音書不可聞故山兄弟久離羣愁來南甸三更月夢去東林萬里雲
徒抱幽憂難作客相逢士子不修文悲歌慷慨因何事半為孤踪半為君

樛葉蕭蕭映紫霞白頭秋思尚天涯幾人海外同為客何處樽前不說家
遠嶠浮雲荒草合他鄉殘笛夕陽斜春明風信須乘早莫使歸帆到落花

一夕天氣爽朗腹患初安扶杖獨步於廊廡之下偶爾觸事甚有感發遂作一聯并書以警衆

九月終旬病起無聊夜來散步四宇岑寂所經一寮竹門半掩燈火透亮側身窺
之乃見兩人俯燈對坐一人一手同作針線甚有自趣自催深恐不及之狀於是
回視各寮莫不沉酣熟睡也諦思裁衣人止為妻兒老小長年衣食雖至情關切

終是他人活計尚克勤如此想參學者為生死大事全是自己工夫何反置之度外而安心熟睡乎不覺感歎信口作一聯云裁衣人手不停針眼不離線從朝徹夜做工夫六時有用真堪愧我參學者參學者身在這裡心在那邊經寒度暑過日子一事無成豈不笑倒裁衣人嗚呼禪人參學不成者不患其無恒患在心不專於道而雜用也心專於道決定志向自然一日不明參一日一年不了參一年務以明道功成為期則不待師友警策自不肯無恒而莫不精進矣奈其人本非求道不過借出家學道四箇字作躲懶偷安覓衣食之捷徑便不復知參學為何事生死為何物管甚道明不明竟與了事人一般飢來喫飯困來眠無憂無慮在無事甲中混過去極好說幾句高曠清閒婆媽修行不通道理的話博他信施利養為得計耳何曾想到衣綫下事未明生死不了為急務耶然不惟不知求道并利養亦不知求若求利養更當明道要知道即利之本其本大獲利更大只怕道不明何怕利不得憂道不憂貧古聖賢殆為此輩說法也蓋因機設教隨其圖利樂之情引誘學道苟到道明自不貪利而以道為樂利亦不待謀而自至矣試看裁衣人日無偷安夜不歇工念茲在茲通身精力俱用猶慮衣不成難得工資究

其所得能有幾何。設或亦如參學者之懈怠。不肯任勞。豈但妻兒老小全家失哺。即一身一口無聊生矣。嗚呼。今使參學者皆有妻兒老小。其妻兒老小之衣食。仰給於參學者。且利養亦在參學中。不得不要道業速成。而苦參力學之狀。有不同於俯首燈前。自趨自催者哉。如此精進不雜用工夫。敢報諸佛菩薩。一齊合掌跪拜下風矣。何故道念若同情念成佛有餘。吾當速改聯句。讚歎贈之不暇。何感歎之有乎。

王聞余病愈。數遣使速還順化。命意詳詳。訂於十月初八日登程。從陸往。先走札諭慶愚後堂。天雨知客。在彼預備老僧行止。

腹瀉頭痛纔愈。口破舌爛。又發。仔細思量。總之老僧薄福。每多缺陷。致常住修造。工匠懸望。隨杖大眾。參差不一。兼之宿生欠人口業債。都要填還。未免勞他太過。以至是也。然少病少惱。亦非藥石可以醫治。惟隨侍和順。便是老僧安穩之方。不慮無水火使用。但患無此妥當藥材。日來精神色力。總不如舊。須得知道理人。與我體貼一上。心同氣合。病不待醫而自愈矣。况兼內外人事。精粗是非。皆要老骨頭支撐。並及左右陶起氣來。還要費許多唇舌。與眾調攝。吾之薄福。固然豈非隨。

杖弟子輩之咎乎。今說不得索性拖泥帶水。免強行去。且看有那箇發心菩薩。為常住為大眾。為老僧。真能為己者。話到這裏。撐持法門之人。若非將身命全舍。安有不大退堂鼓耶。刻下國王。又差內官持書。請老僧上順化。言方丈寮室厨庫園房。從新造在天姥寺。供應俱備。專候行李。此一片至誠供養心。甚為難得。因允。次月初八。只得拽杖走一遭。汝等在彼應先料理。無至老僧大眾到時。七起八倒也。凡彼中官民落索世事。一切勿與始見吾道人行履。致囑致囑。

初一日。內監奉令。先至撥擡軍三百名。與馬備乘行李。扎縛。適值陰雨。作寄駙馬右屯營書。

聞大越國有樞密駙馬元公者。品志賢豪。為霍驃驍一流人。而深信禪那。作吾教屏翰。又非霍公所能望見。知其人非一日也。况千里蒞任。出鎮之際。方寸中尚有。一遺世老頭陀。在順化寺林。特囑公弟持華翰。以淨俸贈。而溫語慰之。可知其心矣。既蒙厚贖。竟蹈不恭之卻。私意必圖。握吐而後。領惠未遲。奈抵國來。諸公槩未往謁。不得面教。曷敢濫叨。但願一識韓荆州。豈不勝封萬戶侯哉。然人之相知。貴相知心。吾謂凡謀面而稱相知者。恐非知其心耳。管仲云。鮑子不以我為貧。以其

能利我為知心也是則心屬利乎。豫讓云智氏國士遇我我以國士報之以其能
名我為知心也是則心屬名乎。以下而言無偽不交非親不黨舉世攘攘誰不言
某某我之相知也相知則是矣其能於我之心果知乎。真相知而知心者如孔子
生於唐虞夏商之後相去千餘年未嘗與三王五帝識面而知其惟微之道心知
吾宗大智出自震旦蕭梁之時隔西竺靈鷲其遠未嘗與釋迦文佛識面而見其
一會儼然未散誠可謂相知心矣。老僧與駙馬至今未曾識面而未嘗不知駙馬
重道之心。知其心未見其人孰謂非相知者耶。駙馬重道心在鄉黨在朝堂在順
化出之舉國路人之口碑尊札佳貺殷殷辱頌天下誰不知之也。但愧無所見聞
之方外朽人何以受過愛之知。故聊以拙畫一軸拙錄一部奉覽。雖筆墨不堪言
句不文亦出老僧之心耳。駙馬哂存榮幸不淺也是時未及候駕匆匆告歸又奈
海風不便揚帆尚未還山暫止息會安王差內使再四見召已備夫馬立候度嶺
約十月望後准到天姥寺此番把晤亦天假因緣自古知心聚首良非容易數行
預布臨穎神往。

初七日內監催夫欲先發扛余瞻風色明日必有大雨恐途中打濕行李須雨後發

行初八果雨至十一始霽十二早起程通吏道領薩庸耆長張絳顏攜樽擔酒金遠送行者送者夫馬駢闐散漫數里秋雨新晴土物如春蒼山綠野刈稻打秧紛紛壟畝將二十餘里與三台相望送者陳茶食具中膳畢辭回方欲紆道三台一宿始行監官不可復去數十里暮色沉烟林端月上遵海而南白水明沙無數蒼苔聲影颯沓宵露衣寒望去蒼茫一派素車白馬排空而至別為一種景色抵旅店而明燈進膳矣次早約十餘里橫渡一溪過小嶺再渡一溪為艾嶺之麓馬不可行悲易網輿嶺下居民最苦官役一行既衆夫不備數逃竄者則沒其釜於官應赴貧民壘形骨立披髮哀懇顧之惻然余語催夫官各給還其釜叩謝而去過午登山石路嶠岨齟齬初行夾道叢篠漸上兩行秀木挺拔數十丈無枝附卷曲由結根林中喬柯奪露故爾聳直安在其麻生蓬中也迴瞰海洋漁艇千帆蟻立不動乃知登高瞰下與仰觀三曜運行而無動相者一致也莊生謂視下猶此誠不誣矣企足高望嶺隱雲際惟瀑泉一道如足練表雲衣而出之躋此為嶺之半云僕夫健捷足若不點地折旋於坎壈苔石間倏忽已身入雲中矣左顧林莽蜿蜒乍度颼颼有聲如風行草偃謂蚺蛇云然莫見其形體矣行邊幽香斷續為艾花殆無覓處也野果交垂山花爛熳至

花上生花。葉中結子。非耳目所經者。不可得而悉。似馬。茆屋幾間。清泉環帶。青茶以
給行旅者。煙嵐常閉。迥隔人寰。絕頂雲霧。飛空沾灑襟袖。仰視木杪。白猿成羣。大如
人。長尾。遷徙飛擲。而振落涓滴也。漸下聞洪洪淋淋聲。望出山坳。一片漫漫。從者喜
曰。下至見海矣。轉近始知為雲也。已而日落月上。木葉交陰。暗石苔滑。遍地青燐。奇
聲怪響。遠近聒耳。獸蹲人立。觸處覲面。杖拄鏘然。乃石也。茆店三間。方張燈。遊客聞
與從至。竄匿林阻。恐拏夫也。巨木為橋者三。結架牢固。湍流激石。噴薄潄滋。乃前疑
雲海濤聲。佇立橋上。山湧月來。空壑多聞。淒神寒髮。比下懸崖。而迎軍列炬四照。投
店宵分矣。名山秀木。絕巘清泉。在在可居。何無卜築其上者。且往來要道。修理無人。
深為歎惜。適有戒子。廣大躡嶺來迎。聞余是言。乃發心募修嶺路。特乞緣引。遂疏云。
惟此要區。古稱艾嶺。接順化西南之脈。引會安東北之觀。日邁時征。歷過幾多歲
月。泉鳴木落。驅馳千里風霜。鎮彝關鐵陵橋。十方分界。占城國高棉寨。八面通商。
何其崖谷摧殘。可奈滄桑遷變。欹斜凹凸。空流出岫之雲。傾覆縱橫。目斷凌霄之
磴。草深苔滑。翠濕煙寒。荷擔僧。參學僧。以彼修行有數。中華客。外彝客。在他利益
必經。如履薄冰。往往艱難履險。似臨蜀道。紛紛辛苦臨歧。當補缺陷。坑好教諸子。

百家雜踏再除荆棘。任使六凡四聖同登。見泥掩泥。尤起布髮承然燈之足。隨地鋪地。還勝買園償太子之金。實進步之本。因豈獨覺之小果。茲戒子廣大乞老僧一言。即據行走人多行方。行便總要二字。護云修善者少。修前修後。超出三途。但從這條路上來。免得那樣墮下去。填半邊水。鑿半邊山。快哉到處。道遙釘幾丈椿。築幾丈土。樂矣興工次第。脚下要令端正。心中須發真誠。或施力或捨財。何妨衆手齊舉。當捐磚當助石。管教一徑相通。動步知歸。尊名遠達。

次早烟雨迷離。盡日行霖潦中。王差左右工部。該伯官駕紅船。預待海口。領隊軍五百。接至中途。跪而請曰。王着某祇候多時。以天雨泥濘。有失遠迎。言訖引導而行。是夜凡三宿旅館矣。明日五鼓登舟。迴憶下會安泊舟時。王臣相送圭峰。添翠路改新流。轉盼五越月也。成道中書事詩十八首。

三台常在望。巖膏昔經過。白鳥去無影。青山奈爾何。王程催驛使。野興結煙蘿。留取天邊月。今宵照舊阿。

紛紛納木椽。正復打新秧。小雪留殘暑。單衫卧網牀。沙墟喧夕照。少婦剪榴櫛。行李勞軍士。殷勤奉汝王。

三宿昇州道。為程半海邊。銀濤驚拍岸。水鳥沒飛煙。衣上露華滿。林端月鏡圓。征夫行照影。簞笠散平田。

細草尚抽綠。平皋十月杪。牧牛疑道者。騎馬喜頑童。綠旆翻涼吹。鳴鉦響遠空。願余堪發笑。海外任飄蓬。

從陸仍經水。西風撥棹輕。煙波隨地出。燈火隔林生。客有難歸思。秋多作暮聲。故山今夜月。最是石樓明。

磴道蒼蘿裏。盤旋紫翠重。雲生三面海。山盡一聲鐘。避世宜長住。出人不易逢。夕陽新帶雨。紅濕半崖松。

亂花明澗底。石裂補莓苔。疊嶂溪煙合。深林鳥道開。虛空領幽異。曲折上崔嵬。忽聽潮初起。寒光到處來。

老僧宜晏起。况值晚秋天。異國征前路。中宵不得眠。雞鳴艾嶺下。馬繫竹林邊。茆店猶昏黑。軍夫催着鞭。

四過橫水渡。一上插天峰。花落空聞艾。雲深不見龍。蝮蛇行窈窕。松鼠竄蒙茸。絕頂何人屋。煙嵐盡日封。

轟雷飛上岸。立水激沙洲。日色平西下。濤聲自北流。海雲能作雨。蠻樹不知秋。過
嶺崎嶇路。青青又渡頭。

秋色紛紛改。林香花氣屯。山羊眠宿霧。野象立荒村。客路山全異。天涯髮亦新。看
來當九月。風物盡爭春。

一望天廻嶂。幾層水繞田。人盤雲樹杪。日落鳥痕邊。暖氣浮霜草。荒茆冒爨煙。當
途有虎豹。行戒況山川。

層巒陰秀木。絕壑響清泉。野果嘗難遍。山花記不全。獼猴挂秋樹。空翠灑晴天。物
色憑誰賞。分明炎海邊。

林深山月黑。處處散青燐。哀響聞猿嘯。危峰逼獸蹲。石苔愁徑滑。網挾羨君仁。記
取其中事。明燈細細陳。

歸舟辭順化。返坐會安車。山影殘陽斷。霞飛陡壁斜。綠煙疑柳樹。紅雨憶桃花。投
宿還鄉夢。誰知不是家。

穿山凌海上。高下鬱參差。歸燕無棲壘。燕窩為土人取餓狐出斷碑。洞門泉曲折。薜荔翠

紛披。遲暮通陵谷。占城罷戰旗。艾嶺舊與占城分界。今屬大越國及之。

秋雨秋風急。行行復暫停。板橋西北路。村落竹林青。遠道天邊下。頽房石畔高。岡一俯首。漁火亂流星。

炎蒸分手地。不道便重來。潦改晴時岸。崖添霜後苔。使臣王命急。冒雨戰船開。獨愧無由報。為書尚未裁。

適水濟居士。聞祝萬侍者言。皆重己輕人。動稱我輩。及問我字落處。彼又茫然大都。我不知我。因書以示隨杖諸子。

世間之稱我者。以假我為我。皆非真我也。如富貴利達。我有而樂。彼有即不樂。是貪為我也。設若一物。吾所貪。彼亦貪。互相貪之。得則喜。失則悲。頓起爭心。是真為我也。以其爭奪。嗔勝而獲利。致貪戀營謀。輾轉無厭足。直至老死。將來猶不知覺。是癡為我也。明明放着一個真我。盡被貪嗔癡。冒名為我。置我無地。使我不知作我。清淨身中之蟲賊。而我竟他昧却。何止終身受瞞。生生世世。為其役使。還道此七尺能行住坐卧。喜怒哀樂。能動能靜。計較思量。竟認以為我之全軀。豈不大謬也哉。然畢竟以何為我。須識眼中瞳子。面前人一切無我。則何物不從我有。如居亭草木鳥獸昆魚。其初不自知為何物。因我目之而著名焉。則居亭草木鳥獸昆

魚皆是我也。珠寶金玉衣飾器皿其初自不知為何物。以我目之而分類焉。則珠寶金玉衣飾器皿皆是我也。從父母而來。我所自出。由子孫而去。我之所生。世間一切事物道理。繼承前人遺制。則前人就是我也。世間一切事物道理。傳貽後人相繼。則後人亦是我也。廣而推之。天我也。地我也。人我也。以及日月星辰山海林泉分而各立。合之無不是我。亦無不是人也。我人萬物一體同觀。始能毋意毋必毋固毋我。是故真人無位無始以來。本我良知。蓋因一念存我執我。煩惱妄生。覺我空我。無明自淨。惟不住人我。斷常等見。真常獨露。何處更容貪嗔癡。假我用我。悉我用渠。渠即是我矣。所謂但能轉物。即同如來。苟達此義。不妨稱我。我自識云。知我者是渠。知渠者是我。渠我各不知。分明燈是火。

十五夜雨。抵天姥寺。寺舊王府也。周垣古木。門敞清流。漁罾樵斧。往來晨夕。畫梁藻梲。比中之傑構。作詩二首。

梵王宮闕阮王開。玉殿朱門生綠苔。一代榮光餘草木。千秋花雨結香臺。庭前雲影山連水。檻外帆飛去復回。未識謫仙天姥賦。夢遊可是此中來。

當年王氣出中流。霸業還歸梵貝修。石闕不留秦歲月。敕書尚載漢春秋。海潮沙

界三千里。風雨鐘鳴百八州。佛火一龕燒栢子。坐消寒月不知愁。

次日王接見喜慰孜孜。各通私慕情懷。遽問曰。聞老和上常住經閣未成。是否。余曰。經閣係石制。臺朱撫軍領藩臬。衆宰官同建。諸料備矣。惟大雄寶殿。粵西當道所許。近聞別陞。則大殿尚缺耳。王曰。所費幾何。余曰。若全須七八千金。今幸木料已有三。四。更得五千金可成矣。王慨然曰。老和上到來。某忝為弟子。毫無功德。於老和上分中。今大殿錢糧。某歡喜肩任。明年歸時。如意創建費。不我惜也。因之述中華梵刹滿天下。少外國王鼎建者。獨浙江法相寺。係宋朝高麗國王所作。至今傳頌不衰。王若成就長壽大殿。將與法相並美千古矣。王忪躍許諾。言長壽歷來興廢。乞老人法言詳示。倘常住更有未完功德。且便代為轉募。并使他日好知祖庭始末也。至夜別歸。作重建長壽因緣疏曰。

須達布金。創梵刹於當年。其功猶超鑿海。賢于插草。豎瓊樓於頃刻。此智還勝補天。喜近水以安禪。况依林而憩錫。猛虎深居。奇險之巢穴。尚可化作道場。達磨東度。初履之寶方。豈不增崇舊業。紹隆大法。古既如然。佐闡正宗。今何不爾。惟茲長壽。初賜前朝。區落三城之西。襟帶百粵之秀。曆皇圖六代。衲子家鄉。坐知識四員。

檀那信地機緣始啓。乃唐盧祖手植菩提。夢感中興。實明按臺囊捐。俸祿王御史
留芳勒銘。炳煥精藍。愍大師挂鉢。哦詩指揮。心要座臨。五羊石門。出白鵝潭。竹木
千行。春到羅浮。分翡翠。波濤萬頃。秋延庾嶺。漾青螺。物換星移。人越幾朝。王霸日
風清月朗。香生百里。素馨田望。中雞犬桑麻。渾如太古。定裏煙霞。丘壑宛爾。深山
尚未理馬跡。車塵儘可容。獅騰象踏。雖則真常不壞。奈何世諦全非。要至無聊。招
提馬。繼椽檐上蛛網。羽絲遮不住。飄搖風雨。法身中燕泥鼠隙。說不得燦爛衣珠。
村裏牧童。竟來牽牛嬉戲。路旁過客。徒向斷壁吁嗟。亦非臺階級。都灰更欲登高
何處。百尺井泉。流盡竭。安知照影誰人。豈龍天之呵護。無靈。抑道運之興衰。有數
愧修行綿力。支法席惟心。勉應眾紳衿。同二十四保之召。恐辜諸耆宿。並公卿碩
索彥之誠。難辭蚊蚋負山。未免螳螂距轍。驅馳三載。不逮臨濟栽松。躑躅九秋。強
效專昌推石。七弦纔奏。萬指齊奔。雖偏廡小構。初成而大厦羣寮未備。正殿配殿
前後左右。殿悉賴新新。禪堂齋堂寶鏡雲水堂。諸祈輪奐。向懷此志。敢告同心。如
曹溪如青原。如南嶽。遍中華。佛祖庭。從無外國主維持。若顯聖。若靈隱。若博山。惟浙
江法相寺。始有高麗王設立。十年蓄意。竟未得巨海全潮。一念格人。或可陟層峰。

絕頂渡河固當用筏。覺岸就在回頭。預把空手鋤。待時乘時種。試畝耕而收。乘易曲象設。而化門開。親面相呈。知音幸遇。一梁一棟。須求真實良材。片瓦片磚。定要磨後結角。不比初期鹿苑。分明別有禪天。縱廣以兜羅界道。高低以綵縷銀繩。報土莊嚴福基作用。設云清淨體本自無形。何消覆蓋。須知功德幢。元先有主。必假修為。大越阮道者。五千金直下承當。粵東厂頭陀。二八願管教事畢。紅玉階前白石磴。隨他人往人來。金香爐下鐵崑崙。笑看花開花謝。文壇士尋題勝跡。走珠江太史公微吟嘉樹。遊香浦壯觀簷。輝映訶林。從茲設列一弘規。自後永為十方院。無私利益。種智同圓。

王閱疏首肯曰。明春老和上歸。代我修建長壽殿堂。得福蔭小國。皆賴慈庇也。乃訂於十一月初四。延隨杖二十四衆。禮萬佛懺。以四十日為期。午後回天姥。東朝侯差家人送檳榔果食。候安曰。主人闡道駕至。理合恭迎。奈卧病兩月。不能親來頂禮拜。言致意。遂回札問訊云。

急切告行。止到岫嶼山前。北風朔浪。帆不能歸。國主聞之。接回順化。一轉眼頃。不覺五越月矣。專使先施。始知大士違和。然五蘊本空。病從何有。總之憂國憂民。起

見也。昔維摩為欲饒益一切衆生，無病示病，先令知夢幻泡影身，大患恐怖，生厭惡脫離之想，而後說法，身功德斷苦，獲樂發其求進道心。及乎衆生病愈，而維摩病亦霍然。大士以是病為衆生作良藥，可奈今時衆生之病，比昔更難調治，莫因其不已而遂不已乎？思念之至，亟欲遣侍問訊，雖有目連、鶩子，不堪問疾之任，所未遣詣，正為大士能以心照覆曇，必知老僧耳。日來道體想都平復，顧此病亦成就人之所不免，為義廣且大矣。堯舜病在博施濟衆，衆生一日困苦，一日思濟孔子，病在老安少懷，衆生一日顛沛，一日不安，老聃病在常樂我淨，衆生一日憂患，一日無寧，釋迦病在指迷破暗，衆生一日不明，一日悲願不了，是故聖人病於捨而克己，凡夫病於耽而恕己，病於名者矯於情，病於利者短於行，熙熙攘攘於乾坤六合間，其來久遠，若一處不病，此一處不成世界，一人不病，此一人不合時宜，天下皆然，則吾大士以一病而攻羣病，又安可以已哉？蓋病由心生，一念未生時，四大尚無名字，心與病皆境緣假合，豈真有耶？是知維摩不二法門，開示多權，大士之疾亦復如是，數行修候，好音報我為慰。

二國舅宋公為該伯時，余初抵國，即以厚禮枉顧，今拜左丞相，舉國稱頌，作啓遣賀。

伏以中書須補衮卜姓氏於金甌丞相實救時調陰陽於玉燭車方後載為論道
經邦之人席正端揆抽石渠天祿之秘公孤不缺冢宰有持恭維首相閣下掌握
權衡位尊文武聲名無愧志不在溫飽之間喜怒如常治豈出拜颺之下誦尼山
於案上半以佐開創半以佐太平資傳巖於夢中用汝作鹽梅用汝作舟楫允稱
國柱持簡王心公爾忘私宰天下亦如是肉矣剛則無欲防民口猶甚于川乎故擇
相無逾於中華漢唐之規模而致君當臻於上古堯舜之風度使主顏大悅知東
軸之得人况公輔多才宜舉賢而破格羣僚咸服百物維新老僧雲水庸派風塵
外叟聞高明愛我不讓諸方蹊徑一唱三歎而蕭索自然且遠近知公從無些子
強為快口直心而溫良決斷三生石上曾經把手偕行十字街頭又得與君相會
乘前願力薰成法苑干城以此心光散作寶坊霖雨伏惟日邁月征早上千秋金
鑑開來繼往永垂百代圖書宗社崇隆君臣道合臨啓舞乍合十神馳

一日登隆侯專使持書為問禪道何物悟為何理復札報之

來教云禪道某所素慕但未知道為何事禪為何物悟為何理向聞究竟心甚留
戀一聞佛字心即不喜自不可解特請高明為我詳示老朽讀此不覺歎曰善哉

非佛心流露。必不能問及也。然未識居士所不喜者。何佛以僧論之。或有可嫌可憎。老朽願與仁者同此不喜矣。佛係我人同好惡之本心。即尊札云。聞究竟留戀之心也。豈有以自己不喜自己乎。且學道原求無事。不聞但於事上通無事耶。參禪原不依物。不聞本來無一物耶。若以事物求禪道。便非禪道也。倘謂人生於世。有功名富貴。妻妾男女。得喜失悲。生來死去。皆事矣。何無事乎。如天地間。山亦物。海亦物。日月星辰亦是物。六凡四聖亦是物。千七百則公案。無非是物。參禪人必一一消歸。焉得不依事物耶。要知禪貴自參自悟。不在他人事物也。不見龐公問馬大師。不與萬法為侶者。是甚麼人。師云。待汝一口吸盡西江水。然後向汝道。且道此語是答其所問耶。是另出一機耶。是指不與萬法為侶之人耶。是有不傳之秘在其中耶。試將此一一究竟。又不得強自穿鑿。妄以意識解會。又莫以一切不立任自所見。於豁達空裏過了去。當在忙亦如此究竟。閒亦如此究竟。縱遇逆境交關不開處。亦如此究竟。管取生處漸熟。熟處漸生。又勿論能究竟之人。與所究竟之話頭。是一是二。是有是無。是凡是聖。是情是理。是世法是佛法。用心至此。忽然撞着。豁然大悟而大笑也。至所言悟之一字。如人有生死相關事。約到某處聚

會商量。方能妥當。絕清早起梳洗穿襪。忙迫間穿了一隻脚。那一隻襪竟不見了。遂向除櫃箱籠中。房屋牀壁間無處不尋。到杳不可得。只得放下氣來。停思至極幽微處。尤不可得。忽低頭看見兩隻襪俱穿在一隻脚上。伸手脫來穿去。便是何等爽快。方知原在自己脚下。悟則如此。所謂踏破鐵鞋無覓處。得來全不費工夫者此也。雖根有利鈍。悟有遲早。慎勿隨一往偷心。稍得一知半見。就認是了。未免走入路頭不是路頭。不是路頭。七差八錯。反不如居士而今總未知覺。還好過半三不四之光景。果要究竟。必須究竟到透頂透底。始不涉歧路也。若非將平日所見所聞。若是若非一齊放下。死心參究一箇大定處。不成浪蕩鑽。亦是昏沈鏡。自己以為本有光明。都見得澄潭清湛。無浪無波。皓月空明。無雲無翳。恐吾如來藏裏無如是法。如不盡降。一往見得透徹。無有不是之習氣。直饒你真到此地步。正謂死水不藏龍。便是生死岸頭。不了之事。有志參學人最忌之病。總被箇明字障在眼前。錯認病為藥耳。苟以本分事為急務者。管甚禪道事理。留總心喜不喜於此轉身。則禪道事理留意喜惡。自然眼上揭去一層翳。不為明暗障礙。否則佛之一字。我不喜聞。雲門道得居士道不得。直須親見一隻脚穿兩隻襪子的落處。脫

米穿去。一任橫行直走去。始信老僧之言不謬也。不然猶坐在飯籬邊。叫肚饑。勿嫌唐突。容當再續。

卧病會安時。果公再四乞舉劉清為管理洋貨該府之職。偶誤聽作札薦之。王批准用舊例。應納國課銀一萬兩。限十日完繳。劉以王批四處強壓勒借。逮余抵順化。眾客船主紛紛歸怨。備述其人素為不端。齷齪有據。念薦賢為國。本係美舉。若此其人。將必剝商害民。反為厲階。正擬明悉其弊。且彼更欲懇余贊助速成。然一誤不可。可再誤乎。遂却之。而果公甚為不悅。謀之近侍寵人。仍稱老僧所薦。究成其事。日後傷敗罪過誰歸。因與國王論用劉清書。

天下事。可有時不得行。道不可一日不明也。事不得行。權不在己。於我無損。道不可不明。言則由我。於人有益。故復因用劉清始末。闡發詳盡。直陳左右焉。嘗聞國有忠臣。家有諍子。所以成君父之為聖賢。故都俞之朝。不忘吁咻。而承歡之下。不遺幾諫。唐虞三代之告其臣曰。爾有嘉謨嘉猷。則入告爾后。又曰。爾毋面從而背。有後言。孔子於子路沒曰。自由也。死。忠言不入於耳。而歎天祝予。古之聖人。惟恐不獲日間忠蓋之言。何也。蓋人君一身託處。臣民之上。喜怒好惡。足以生殺貴賤。

於人而為臣下者大都固富貴貪生畏死之流多愛君愛國正言直告不避危亡者極少更有一種機深奸險輩結交君之私人與女寵宦官連成一片惑蔽人主耳目排抑正人拒絕讜論以便竊弄權柄援引奸黨圖已利不顧其君所以忠義之臣見其如此愛君之情迫於不容自己初或婉轉規諷不從則繼以危言觸怒甚至以死諫以去就爭此豈不知邀君喜好以得富貴而必欲犯惡怒以取貧賤哉誠以忠愛素明以用人行政間務引其君於正道不肯苟且貪污以遺君有後日之悔而已老僧開法中華三十年來飢食困眠冰冷方外亦時熱腸於國計民生居是邦必為王侯卿士所泛愛時政之得失民生之疾苦每承咨訪知無不言言無不盡輒中其要於事幾未著之先而當路公卿亦以余身居局外於世間事理了明洞達無貪利無懼害能於是非當否明目張膽切指情弊事或關係者以一言而決今日之在貴國與在中華立行無有二心也況今老僧與王名分賓師愛猶骨肉前日於劉清曾有一言之薦是老僧誤信國師也既聞衆口同詞備述其奸知為不良之人辜恩負德其素性也當我朝掃清海上時無所依歸藍總兵止一面之雅那而翼之藍酋不能贈督渠肩認貸船付之泛海營生恩德之於劉

清不可謂不厚矣。受藍厚恩，不思圖報。一旦相負，去而不還，累藍賄賊，則國師今逆老僧為渠竭盡心力，維持擔認。他日亦不難辜負。勢必然也。猶望其做好官，為國効勞，以報王恩。此萬無之理矣。且昧心之人，無權無勇，尚藉他人威勢，以逞暴肆惡。設法夤緣，瞞王硃筆點名，強壓借債。若一官到手，軍士為爪牙，愈得濟其狼毒之性。又有同類一班曖昧鬼蜮，為之主謀羽翼，必致枝節橫生，殘害商民。為地方姦賊，兼借債為官，常分所入，不足以供每年子錢之費。母錢拖欠，無所從出。必在洋船商貨上，百計誅求，甚至敲骨剝髓。船客歲遭其害，將視此邦為畏途，而不敢來。既斷商賈，是貽害於國也。又且傳播四方，謂王國待客人苛刻，其損德主聲名，不更甚乎。彼輩奸謀四布，強者受其詭計，嚙託而不能言。弱者畏其毒手，而不敢言。今日老僧不言，更有誰為王言者。此所以極言不諱，而不欲王之用也。豈容以三千金為市，欲余顛倒是非，再加一詞贊許於王前，以成其事。不亦更可笑也哉。不思老僧受王誠請皈依王之拱養，何事不隆重周全。老僧即有未完功德，王必歡喜成就。寧尚屑屑於錙銖污穢之物。試看老僧在王國中，將一年矣。從未有

一事受人賄囑，求王用情者。初時不知，誤薦于彼。亦國師之愚，非老僧意也不然。

前日數書何以如是激烈也。王敬愛老僧者也。敬則不忍人之輕視。故言豈待老僧不如婦人女子使王痛心也。愛則不舍我遠離。故言否則即日下會安度歲。使王動情而勉從也。所謂言不迫切。則聽者不人也。所謂以去就爭者也。王既知而終用劉也。王不肯違國師也。吾有以諒王之仍為愛重老僧也。何也。國師係老僧法子。王所供養。因國師而得親近老僧。此王厚德不違國師。正深於愛老僧也。昔孟子至梁。惠王曰。不遠千里而來。亦將有以利吾國。孟子則告以仁義利國。老僧恐劉之殘害地方。是老僧以仁利王國也。至以危言力爭。欲挽其事之合宜。是老僧以義利王國也。以仁義進。王正老僧深於愛王也。老僧謂不可用劉。言言切直。老僧愛王之心盡矣。王不違國師。仍用劉。亦謂老僧曾有一言之薦。且不忘因國師得見老僧。王愛老僧之心盡矣。兩心交盡。如青天白日。絕無纖翳。彼此無礙。如秋水澄潭。了無渣滓。雖謂曾無是事。且無是言可也。然既如是。又何妨。果有其事。且果有其言也。獨惜國師已成白首。比邱不念來日無多。急向自己分中料理。甘心於奸險輩。窮晝徹夜。用盡心術。策畫圖謀。冀王不從吾言。是欲吾道不行。弟子報師之心。當如此耶。然吾道不行。爾道可行乎。行與不行。不見孔子云。道之將行也。

與命也。道之將廢也與命也。公伯察其如命何。尤望國師於此。回光返照。毋致終身不覺不知。為羣小所聳聳。切念國王國師。皆老僧弟子。不得不以深心相為也。因不惜醜縷。直言以告。惟亮不謹。

溯自上元登舟。月盡抵國。初住於順化禪林。再住於會安彌陀。阻風岫嶼。轉住天姥。泛大洋。度文嶺。往復乎山海之間。在再年餘。日遂與王臣酬對。四衆盤桓。耳目既親。傳聞所屬。凡為政治之得失。風俗之邪正。山川人物。草木蟲魚。縱所未經者尚多。然知遠之近。已粗悉其梗槩。事無分於巨細。物不擇於妍媸。關要必書。奇異必錄。敢謂道行南國。有當君子之居。要使外彙土俗。備聞見於中華。或者習俗遺風。莫轉移於異日云。若夫五嶽四瀆。誇經歷廣遠於子長。鉤譬箴竹。搜奇珍異產於博望。則吾豈敢其間因事發言。綴之成紀。至抱病會安。養閒天姥。日月既淹。不無人事之應酬。與致之感發。觸境而生。因人而說。見索他人。吐露自己。或共得於一時。或分成於曠日。既無倫次。紀帙難收。另為一卷。顧茲率爾荒唐。不堪問世。庶幾因言考意。得意忘言。間有當於筆墨支離之外者乎。續錄於左。

海外紀事卷五終

清 嶺南長壽石頭陀大汕厂翁撰

客窗風雨兀坐夜深。偶閱國士翁記錄論詩說禪話。似是而非。大都佛法文章。賦詩作偈。貴在打破意識。從根本智流出。自有自然落處。徒使博學強記。未免附會牽合也。因書此與攝之黃居士。一消寒雨。并示諸子。

書固不可不讀。道猶不可不明。真明道人。雖不習文字。未嘗不通文字。若不明道。徒攻文字。未免強合。雖言句了了。義無落處。每有之也。予瞻學士之為文。筆隨意到。如風入竅。如水赴壑。逆順莫不自在。此即真禪。及乎作意說禪。有舉空申書經跋金經一篇話。竟不知是經。非可以色見聲求者。判為止得半部。此其強合也。既自知為五祖戒再來。何又忘却本分事。反問叅察。託山色溪聲。方稱悟道。此其強合也。金山酬四大五蘊話。輸却玉帶鎮山門。往往鼻索落在他人手裏。以其一向用意識卜度。聰明義理。實不曾於道上打破。隔陰之障。病在恍惚。蓋未親見端的耳。神秀大師在黃梅會下。為八百龍象之首領。博聞強記。誰不推為第一座。其說偈曰。身似菩提樹。梵語菩提。此云正知。亦云正見。虛靈無質。惟性圓明。或可指月與身何似。况離却正知。

正見所謂之菩提。則菩提樹豈有眼耳鼻舌百骸四肢而可以比人之身乎。此其強合也。又曰。心如明鏡臺。不管事理虛實。明鏡下放一臺字作韻脚。致鏡虛臺實。所言時時勤拂拭。是拂拭臺。非拂拭明鏡。即心如鏡。已非心矣。如鏡之臺。又於心何與。西天四七。東土二三。皆以心傳心。非以鏡傳鏡。而臺傳臺。此其強合也。作詩文有起承轉合。說法亦復如是。諦觀偈。以身心雙起。偈語勿使惹塵埃。是單結明鏡。失却菩提。非徒攻文字而義無落處乎。此其附會強合也。夫一偈且不論。道之是否。即字句之間。已患三病。所以盧行者別於菩提。本無樹。明鏡亦非臺。只消本無。亦非四箇字。如迅雷於迷雲黑霧裏。從空劈頭打下來。電照分明。臺樹之非。不待揀別人有不點然者哉。然又恐人棄之。臺樹更認菩提。明鏡為本有。故直示曰。本來無一物。何處惹塵埃。尤向非臺無樹外。重轟霹靂。將菩提明鏡。一并打碎。要使人無棲泊處。自尋下落。此謂本來無一物。非明鏡菩提。若明鏡臺菩提樹。現有三四物馬。可以言本來無一物。急欲當人究竟歸宿處也。全妙在追問何處二字。要他自己辨識。何處惹塵埃。始知本來無一物之落處。本來具足。本來清淨。何勞拂拭。若用拂拭。鏡即不明。待拂拭而明。終為認影迷頭。所以拂拭鏡臺。而忘却菩提。究竟與菩提明鏡何涉。只在這

一問直追何處頂門一針奪鏡奪人奪法縱奪並到殺活全彰我無一法與人止是識病。豈欺人語哉。凡我人之總要。所貴明道。道明又貴體貼。則一法通。法法皆通。不信請看素不讀書之盧行者。所見文字。如此精微。我以為世所求通。無如明道。再能讀書。不猶不勝過槽廠中行者幾籌也。多見近來參學人。道又不明。書又不讀。強欲說禪說道。作偈作詩。何異蚊足取大海水。望其為霖為雨。焉可得耶。攝之居士。讀書中之通人。嘗向長壽火爐頭探討冷煖。不肯以文字聰明。自甘其心。務要與子瞻出氣。不為古今老和尚舌頭壓倒。是事暫止。且道今夜簷前雨滴滴。為甚麼不落別處。

示亦爾記室

親師學道。如投胎也。生於貧賤之家。自幼見聞。負戴謀生。卑污覓利。薰習如此。身心下劣。無復言之矣。生於富貴之家。從乳哺中。愛惜保重。衣以錦繡。食以珍羞。種種調養。惟慮不育。漸漸長成。教之詩書六藝。文采聲華。有不望其上進。而繼祖宗之業乎。惟恐英年子弟。驕傲氣質。豪放自用。誤入歧路。未免聰明浮忽。知見偏枯。學問無成。功名馬達。所以父師訓誨。亦必朋友攻擊。勉勵造就。設一懈怠。錯過日子。後悔難矣。學道人做工夫。亦猶是也。據老僧從幼多病。不及書香舉業。因投先丈人剃度。參方。

未幾便明本分。杖人遂以瓊樓玉殿。令小草擔荷。自此以為無事人矣。雖見地粗定。學地全虧。拉拉担担。柱柱撐撐。將謂做知識。究竟書不曾讀一句。字不能寫一箇。兼之缺陷多端。滿擬從頭造履。日來月往。光陰迅速。不覺鬢蒼鬚白。嗚呼。老矣。轉思辜此現在身心。失却當來種子。只得一面行道。一面習學。無躬追昔。畢竟不如少年色力。記性悔之無及也。近見後生衲子。相貌魁梧。氣體強壯。若肯立志。何禪不可參。道不可明。終日悠悠忽忽。虛度韶光。誠為可惜。即有幾個肯參學者。而又妍媸莫辨。皂白不分。這邊挨挨。那邊擦擦。如此費盡草鞋錢。行脚到阿逸多。下生時無有是處也。不知參學二字。先要分箇清楚。參當截斷一切階梯。不向他覓。豎起脊梁。凝一段真氣力。就在自己屋內。打出一條活路來。謂之參至涅槃。心易曉。參別智難明。於此不妨博覽古人典籍。一一又從外面打進去。夜明簾內。得箇轉身。使表裏精粗一貫。擴充。使人見聞處事論理。必到至善。謂之學。邇來禪者。莫不守株待兔。不思處處窮追。終成擔板。講教者。日數他家財寶為己有。不顧衣裏之珍。總之貪觀天上月。失却掌中珠。而宗教兩門。要箇參學全人。甚難得也。勿論茫無入處之輩。縱具無師智者。自得。一知半見。脚跟未穩。仍被境緣遷轉。是必求師友互相激發。庶幾穩當。脚跟穩。

當更少不得師友。淘汰何故不見云。道德從師友有之。不獨無師不可。無友亦不可。麻生蓬中。不扶自直耳。奈此世間真師固少。而真友尤不能得。試看目前之友。連他都在無可否處。相對時只將一派阿諛贊許。作好好先生。不獨愚我壞我。竟要斷送我。只少殺我方將。遠避不及。而尚可親之哉。若是真友。自能責善斥非。直言不諱。纔是為我愛我。直欲成就我。而肯以忠告告我。故古人得一同志真友。勝於同胞者。此也。然又莫怪若大世界難尋真師友。今先要求一真學道人。就不可得。縱有師友。又不見有學人。大都似此泛泛水中鳧。只可隨流飄蕩。若遇重波疊浪。傾倒而來。不消一觸。汨沒無影矣。夫苟真學人。深恐無嚴師辣友。設有真肯為人善用鉗錘煅煉之。阿師循循誘之。時時激之。惡言毒語呵之罵之。豈獨勞無辭。苦無怨。甚至逐之不離。打之不退。愈逼迫而愈精勤。愈折磨而愈發奮。方見學人之自肯耳。若亦爾從今志向獨切。願力真誠。不消用心四五年。管取掀翻窠臼。使無位真人。堂堂獨露。宗教事理。那此隔礙。一任呵風罵雨。所謂應無所住而生其心也。學道人最怕自欺。自欺則意不誠。意不誠則心不正。心不正則聞聲住聲。見色住色。心依境住。頭頭絆染。處處隔礙。以至心不在焉。視而不見。聽而不聞。患在住境生心。心不自在。盡為聲色有無。

所用。用心於有無。竟不知用心於無有。亦不覺但能心無所住。住亦無礙。住無所住。乃見常住。真心虛而寂。靈而明。能照一切物。一切物不能蔽。七通八達。做個出人頭地之丈夫。到這裏始知發心學道。即生我之父也。真參實悟。即成我之師也。志願不遠。即益我之友也。回顧父師朋友。本非別有。總在自己一箇堂中。大家鼓掌曰。我不負男兒出世一番。使老僧亦慙愧矣。

與大越國右丞相宋公書

去年承顧。重拜嘉貺。自爾聞問。雖通而語言契闊。新正謁賀。始獲登龍。倒屣拂席。款接殷勤。足見明公虛懷雅意。不減元公吐握之風。至促膝深談。為國朝宰輔。身在世間。首以緇流濶濫為戚感。思以護生須用殺。俾獲秀去而嘉穀興。更見明公為道中金城湯池。屹然雄毅。非願力再來人不能也。老僧自抵貴國。深以此為痛恨。方念吾輩擔荷佛法者之責。獨駐錫日淺。未能細察隱微。况彼一向法化無聞。從不知為僧所作何事。而遽以重罰繩之。是不教而殺。謂之虐。非仁人惻隱之心。得為教化之願力乎。面答匆匆。未及詳晰。願復將世出世間事。殊道合者。續而陳之。今天地不能有陽而無陰。帝王不能有賞而無罰。叢林不能有提挈而無清規。三者運用不同。而

出仁愛之心則一也。天地無言而二氣往來。春生夏長。秋實冬藏。自有雨露為之滋潤。霜雪為之凋零。而百物之受形氣於天地者。不無大小厚薄之差。大者受氣厚。藉雨露之仁而生。依霜雪之嚴而息。生息愈久而根莖日固。枝葉日蕃。遂以為天地之愛之如是其篤也。小而薄者。雨露之仁無以救其朽敗。霜雪之嚴適以就其摧殘。生息漸遠而根莖日削。枝葉日衰。遂以為天地之戕之如是其酷也。不知栽培傾覆。天地止循其二氣往來之常。而物之覆載其中者。各成生殺之異用。則不可謂天地之止生而不殺也。至於九年之水。七年之旱。陰陽亦有偶乖其用之時。此則氣數之變。而非非常者矣。君者體天行道。臣者奉君子民。顧君臣咨警。懼羣黎之未安。為田里樹畜以養之。學校以教之。使率由於日用孝弟之中。秀良特出者。則有鄉士。遂士之薦。干旄爵秩之榮。遂以為君相之愛之如是其至也。即奸邪貪戾。初未嘗不為之委曲化導。終或頑梗不從。乃移之郊。移之遠。聽其自新。既而匪辟之習。日與性成。害及善類。始有放流之譴。刑戮之加。所謂殺一人以生萬姓。遂以為君相之棄之如是其極也。堯舉九官。十二牧而不諱。四凶之誅。文王惠鮮。懷保而崇。侯密伯有伐。必明君良相。虛公正大。故能於善惡之倫。舉錯不爽。而天下日抵於平康。設上蒙下。諛賄賂行。

公任一己之好惡為愛憎。正直守理之人。怒其異己而排之。譖諂賄貨之徒。喜其附己而親之。於是爵賞濫及於小人。必致刑罰妄加於君子。浸假譖邪滿路。羅織為奸。蔽惑人主。聽視政出私門。上令下更。民無信守。政亂國危。有不可言者。所謂信賞必罰。非明廷無欲之大人不可也。迨夫衲子自披剃為僧之日。北面載拜而辭君親。超然方外。已為世網所不及。慈忍之權。悉操於師長。溯行震旦以來。敬鼎三峙。中華京省郡縣。孔廟之建。與寺觀並崇。以祝釐護國。守土宰官。延擇明眼宗師。主持法席。十方雲水。視為依怙。堂頭與之嚴明戒律。量才設授。使各從本分體究。潛行默用。格外提攜。以轉凡成聖。根器正大者。自然直取向上。一路精進修行也。然叢林深海。凡聖同居其中。愚頑狂妄。不能動循戒律。敗檢踰閤者。間亦有之。於是設立清規。輕則跪香跪懺。重則罰擯燒衣單。甚則活焚。以為法門除害。在慈悲廣大。亦何所不容。而於冥頑暴亂。究不得已。而以大忍行其大慈者。正以摧邪扶正。不令魔業得以辱沒佛祖門風也。若一種逆行菩薩。行深妙密。脫盡窠臼。與世間假老實裝真誠念佛修行者迥別。如豐干規子濟顛。蟠子之流。應化聖賢。不妨晦迹穢行。橫提倒用。游戲度生。而自有出身作畧。具超方手眼。始能辨識。苟遇肉眼凡夫。鮮不以為非僧所為。亟欲

殺之而後快者矣。豈不為冤哉。故天地帝王叢林各有賞罰生殺之用。而要歸於維持世教以正人心。未嘗不同者此也。蓋國家設立叢林。非但造理衲子。明教外別傳。直指人心成佛。且以朝夕焚修。默運虔禱。以為生聖明為國君相。使在朝皆賢良正。直無不教以忠孝節義。使天下知有為善之樂。四方烽息。囹圄空虛。於以調燮陰陽。五行無愆。雨暘時若。羣生長育。而無札瘥夭昏。將見刑不用而人服。殺不行而人畏。有不熙熙皞皞。而臻邇隆之治者哉。今國王春秋鼎盛。仗明公昆玉為忠良。擢之冢宰樞要之地。而又戚屬涓陽。為所得為。正宜虛己禮賢。集思廣益。用正人行正事。進正言。建立學宮。敬禮師儒。講明六經聖人之道。自王世子及大臣子弟。民間俊秀。咸令入學聽講。各府俱設學校。教育人才。不出十年。舉國漸曉。然於大人修齊治平。繼往開來。正大理學。國中政事。皆據理而行。不以詐術陰謀相尚。王每有令。先與大臣商確於天理人情之公。而後舉行。至王令一出。勢無移易。庶威令尊嚴。而大權不致旁落。書曰。王言如絲。言一出而不復反也。而匹夫一諾。尚千金不移。豈王人命令。而是非曲直。竟得以錢賄多寡。囑託大臣。購蔽人主。致一事而數經反復矛盾。即如蔡清官死於貴國。貨物資本業已啓王。奉令三股分派。付船主帶回。交其妻子。為養廉。

始見至公無私仁正之邦。誰不折服乎。豈有王命既行。復又借端違令。橫行亂作。竟與羣小互相默食。使蔡清生死不白。四境聞之。則君命不如臣令。不亦羞德主而輕貴國也哉。竊念貴國開闢以來數十世。大率草創因循。一切綱常倫理。禮樂政教。藥置不問。不過因陋就簡。苟且偏安。國主成年而知求明公。又以算商持籌而不暇及。無君相為之倡。國中自膏然不知聖賢經理之道。人皆背義從利。故狐媚敢於縱橫。豺虎得以當路。而守正君子亦無能以杯水而救車薪之火也。已抑更有進焉。君侯昆玉皆位極人臣。權總樞務。老成勇戚。勢處滿盈。極宜履謙抑損。避謗引賢。令舉國臣庶盡諒明公潔已奉公。引君正道。而無覬覦之私。行將與國同庥。社稷宗廟。世世綿長。芳聲傳於史冊。不亦猗與休哉。否或不能正心率物。任奸回宵小。以為奔走腹心。妨賢病國。聚斂徇私。侵撓人主威福。恐一旦時移事去。勢同瓦解。即欲求為匹夫而不可得。如漢諸呂。唐諸武。以及五侯七貴。彰彰往籍。大可寒心。老僧叨王禮為師。見愛君侯。承接席之歡。輒發其不諱之論。少效愚忠。雖在高明廣遠。不復顧此老僧。常談尚期泰山不棄土壤。益成其高。河海不擇細流。益成其大。毋以鹵妄見呵。則國王幸甚。生民幸甚。君侯幸甚。

提得起放得下。便是慷慨漢子。惟怕向舌頭上出兵。空設天門陣。虛磨雪刃刀。則不持鈍置去非。亦鈍置老僧。兩相辜負也。古云。大悟十八遍。小悟不知其數。更不應以少為足。當棄小而就大矣。苟要徹底掀翻。千了萬當。報從上莫報之德。須具殺人。不轉眼的手脚。逢佛祖殺佛祖。逢親友殺親友。逢人殺人。逢自殺自。方得快便相應。稍有瞻前顧後。擬議將來。好一把利刀。反落在別人手裏。不見瞿曇老子發心時。何等奮勇。錦繡江山。一舍總舍。父母妻子。一割就割。始有睹星大悟之日。至今稱為天人。師調御丈夫也。子乃有氣骨人。消不得自首二字。直下一揮兩段。說甚臨濟赤幟不可奪。曹洞司命豈不在掌乎。雖然。到這地步。最怕以自為是。撒潑便行。儘有差別。智難明。須要如喪考妣。務將世出世間。內外典籍。前後秦漢。晉人清談。宋人理學。細細讀過。以及經濟權變之顯密。機宜逆順之進退。百家諸子。一一涉獵。方足補偏救弊。莫似近時好做名士者。書未曾讀三四卷。物理一無所知。遂要做晉人樣子。持出翻騰。不管先賢後達。偏檢最有意思人之極名言。極善行一兩則。逢人便舉。僻說謬談。糊判亂斷。指摘不已。貶駁盡情。罵絕古今。使人見他議論風生。笑傲自居。若有參天學問。

緯地經綸。不怕不以名士才子稱之。自此搖擺起來。安然自大。究竟書不曾開卷。事不曾見面。以此欺世盜名。即吾道中甚多此類。嗟夫。儒釋兩聖人之門。何不幸而有此老僧。非欲見聞。奈生在世間。搃着撞着。不是假道人。便是假斯文。焉敢不以假面孔相待。豈吾本心好為之哉。蓋因年來常住。修造公案未了。只得隨宜宛轉。但使叢林殿堂樓閣。廚庫山門。願力一完。急急閉戶讀書。作終身之計矣。念汝尤在英年。趁此精力強壯。極好埋光下手。謾謂於諸方。喫過幾多鹽醬。長壽棘棘。吞了多少吐却多少。雖非與望煙尋食者同日而語。甚勿以見過大海而自滿其水。又莫以更有須彌而自小其山。正宜高築牆。謾稱王。三年不鳴。鳴必驚羣。所冀他日。鵬起南溟。抃見吾佛祖脚下有人。不辜老僧拭目之意。所謂時至勿失。今之時當何時耶。餘不瑣瑣。為酒過者說。

人各有為適情之具。詩書六藝而外。以及品茶飲酒釣弋。聲色陸博。凡所以引人耳目口體之交者。不一而足。蓋血肉之軀。頑然獨守。使五官四支。絕不與物接。則氣脉鬱結不得流利。天機亦將沉滯於枯寂。而不復發揚。是則適情之具。外可以運行氣脉。內可以發越天機。而為人之助者不少。孔子獵較任公垂釣。殆為是歟。世之人自

己不能作主不取適情而惟情是適一入其中遂致流蕩忘返以喪敗其血氣殄滅其天機竟為吾身之大患所以毒藥砒霜用之恰好亦能生人不然即參耆附子用之過度亦能殺人即此是也然人於諸具中或限於力或隔於地或缺於習縱欲為之而不能至於酒則隨分可致由是古之因飲而成名者固多因飲而敗國亡身者亦不少邵子曰玄酒味方淡此言其最初者也寢假有儀狄之制禹飲而甘謂後世必有以酒亡其國者迨夫酒誥抑戒先聖先賢自遭其失驗於己而鑑於人不自文飾備形醉態設立防圍以垂後世既詳且盡矣而後世一種聰明瑰偉之士就於其中弄出許多聲勢面目反令人見其醉中之妙不復以是為嫌若淳于飲辯淵明飲韻嵇阮飲狂青蓮飲興於期飲勇數子者莫不各有所具於胸中不過藉此以寄其牢騷襟韻於是人得而稱之終非以其人之妙悉存乎此也故吾瞿曇戒飲酒而於藥蜜醍醐釋子亦得少飲以培養其精神調和其血氣是瞿曇雖戒而飲也孔子不戒惟無量不及亂不及亂則戒矣量而不亂人或能之無量而自不亂非聖不能要知瞿曇戒而飲孔聖不戒而飲皆不妨以我飲酒不以酒因而用我意未嘗不同也苟遺簪墮珥倒載接羅藉口於淵明嵇阮之流以放浪於形骸之外無古人之具而

徒縱其情。不將與庸俗拘繫之輩。猶為彼能得於此乎。渺姑射之山。有神人焉。不飲不食。而肌膚若冰雪。顏色若桃李。何嘗待此以培養精神。調和血氣哉。彼自有所為。飲食者存。其於儀狄之尊。不啻鷓鴣之視腐鼠而已。吾願世之人。慎毋同猩猩之嗜。好也夫。

示阿矣知藏

阿矣正在得意英年。繁華靡麗時。一旦投老僧剃度。以參學為務。是不待曲終酒闌。而抽身。非愚客也。然參學一路。行如矢。求如金。古之不用梯屋緣鑿蜀道。挺身直進者。固多。而逆水撐船。進一退十者。亦不少。要知此事。猶登壁陡峻嶺。無由階級而上。始得。倘謂工夫。茫無把握。從何入頭。不知但有把握。便不是不由階級登峻嶺之旨矣。若非從無階級。而求登峻嶺。安得有工夫哉。故壽昌老祖云。虛空有路。虛空大。但恐時不解行。行得上去。非其人不能。話到此處。甚不易言。除非死盡一往聰明心。計較心。義理十度心。孳孳一味。以呆鈍心。如老鼠齧棺材。認定一處。朝齧暮齧。自然齧透一個去就。不至登峰無路。望崖而退也。如斯呆鈍者。還勝於學人在一段公案一章書。音不明。便認字牽合。以聰明意識消繳去。誰肯用面壁九年。寒窗十載。以待呆

鈍心中。跌出佛祖聖賢來。昔趙州開法問一答十。忽遇問畧約二字去不得七十而
又行脚。必以親到親見。一四方休。蘇子瞻千載文豪。喜笑怒罵。行於筆墨。皆有明珠
走盤之勢。一到說禪。便失本色。是聰明計較。無濟於道。即此可驗耳。今阿矣。似聰明
靈利。不肯與呆鈍禪和為伍。又不以道為實可明之事。日逐紆迴於悠悠忽忽之間。
則聰明反致呆鈍。而又不肯呆鈍自甘。每向指月錄上討活計。吾恐貪他一粒粟。失
却半年糧也。殊不知五位七事三句六相四喝四縱一十九門。總不在方策內。日用
尋常穿衣喫飯。紅塵浩浩。無處不是。但須親到親見。始不被古人舌頭瞞却。如不親
見。以為我已會禪道宗旨。明本分者。何異長壽老僧。閒坐在招隱堂前。澱心亭上。望
阿矣。何日得真正發明底事。與老僧一解悶懷。及四五年來。竟不見有些動靜影響。
因不見時。每想像曰。此時阿矣。必閉戶謝客。燒香禮佛也。此時阿矣。必蒲團靜坐。究
竟本分也。而阿矣。實不曾燒香禮佛。蒲團靜坐。皆老僧意中思維阿矣。固以本分肯
如老僧之意中思維乎。不然。試看吾宗之書。亦復如是。其所載曰。此為仰宗。此曹洞
宗。此臨濟宗。此雲門宗。此法眼宗。亦曰。即非為仰。非曹洞。非臨濟。非雲門。非法眼。何
故。以其有色可見。有聲可求。有語言文字可通。從門入者。不是家珍。苟要親見。從上

諸祖落處阿矣。本來面目。須向指月錄諸策子未開卷時。因地一聲。諸祖一時出現。始見自己本來面目。如是如是也。可識這箇因字否。稍有未然。勿輕放過。

示可中侍者

本有箇好好的天真佛。不覺此生落在強盜窠裏。被意識引誘。漸漸薰染。就弄得東張西望。打村劫舍起來。一入這夥內。無救無歸也。可中侍者。斷髮出塵。似能與強盜反夥。棄妄歸真之志矣。相依老僧。屈指十越星霜。時中不知何處留心。何事得力。不妨將自己所知一體貼看。最初棄妄這一念。非決烈男子。聰利根性。不能甚有造道之基。與其日逐悠悠的流忘源。混混沌沌。沉淪本有。又莫如仍舊入夥。不亦免得望洋之歎乎。大都有七尺軀。之後生。易偏在無憂無慮。清清閒閒。以致溺於情膠。於愛汨沒於流俗。自在呼之不返。便為可惜。若處情不戀。處愛不癡。處得意順境。不驕傲。失意逆境。不衰志。孳孳以衣綫下事。不明為急務。始見丈夫氣度。唯恐無恒。因循過去。又怕浮忽執滯。四箇字就誤了。所以王陽明先生向及門弟子曰。顏子是最聰明人。凡聰明者多浮忽。故其問仁時。孔子答以克己復禮。以真實言專治浮忽。曾子是最履實人。凡履實者多執滯。故孔子特告吾道一以貫之。以活潑語專治其執滯。孔

子設教因人而施也。然謂因人而施信已。顧顏子問仁才聞克己復禮就請入門之目。是為他人作引。請孔子就其請而答。正是打鼓弄琵琶相逢一會家。顏子豈浮忽之人乎。曾子才聞吾道一以貫之。便能曰唯。復告諸子言忠恕而已矣。一貫之旨。果忠恕二字便消得。則曾子非執滯之人矣。是知陽明之告門人。莫不因人而施。老僧舉此亦猶是耳。有以賊為事者。欲誘子授其業。夜往一家。引子入櫃。鎖櫃竟回。少時子亦歸。問所脫之狀。子告作鼠聲。其家命僕開櫃。放鼠乘虛而出。父曰。作得賊了也。噫。顏子問仁。曾子曰唯。非櫃中作鼠聲乘虛而出之所以哉。雖未敢以可中上比先賢。亦當知舜何人也。予何人也。今老僧因汝強盜窠裏逃來。正好鎖在櫃中。看爾作何擺布。又勿乘虛而出。須當另尋活路。脫身始得。設若擬議。正好下手。

乙亥春赴大越國。請越歲歸帆。已在初秋。計甲戌靈雨荔子少。而味復不佳。不飽餐者三年矣。鄭子元居士由閩入廣。食荔支每為品評于其還也。書此送之。海外還舟未十旬。客中頻日送歸人。羨君載得西湖月。南北高峰作比鄰。

黃柑十月飽經霜。不及離支五月香。幾度嶺南過夏至。脆梅荔支名品滋味可曾嘗。

冬日紫詮王大參招樊太史劉銓部暨白社諸公過集小院分賦得七陽

卧病訝相訪。都忘三徑荒。到來鐘渺渺。坐久月茫茫。海疊階前浪。花辭傲外霜。松門過使節。水木有輝光。

